

ԵՐԵՎԱՆԻ ԱՅՈՑԱՆ

ՄԱՅՐ ԱՔՈՒ ՍՈՒՐԲ ԷԶՄԻԱԾՆԻ
ԿՐՈՆԱԿԱՆ, ՄՇԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ

«Լեռնային Ղարաբաղն այսօր եւ վաղը» խորագրով համաժողով

Ն. Ս. Օ. Տ. Տ. Գարեգին Երկրորդ Ամենայն Հայոց Կաթողիկոսի օրհնությամբ եւ ԱՄՆ հայոց արեւմտյան թեմի առաջնորդ Տ. Հովնան արք. Տերտերյանի աջակցությամբ 2022 թվականի նոյեմբերի 11–13-ն Ամերիկայի Միացյալ Նահանգների Լոս Անջելես քաղաքում տեղի ունեցավ «Լեռնային Ղարաբաղն այսօր եւ վաղը» խորագրով համաժողով, որին իրենց մասնակցությունը բերեցին առաջատար մասնագետներ տարբեր երկրներից: Քննարկվեցին Արցախում հայկական մշակույթի պահպանության խնդիրները, անդրադարձ կատարվեց նաեւ աշխարհաքաղաքական, դիվանագիտական եւ իրավական հարցերին:

Լեռնային Ղարաբաղի մշակութային ժառանգության պահպանությանը նվիրված միջազգային համաժողովների շարքում այս հանդիպումն արդեն չորրորդն է:

Քննարկվեցին արցախյան 44-օրյա պատերազմի հետեւանքով աղբյուրների վերահսկողության տակ անցած հայկական հոգեւոր, մշակութային ժառանգության պահպանմանն ուղղ-



ված ծրագրերը՝ մտահոգությամբ անդրադառնալով հուշարձանների ոչնչացման փաստերին, ինչպես նաեւ արձանագրելով նախկինում Ադրբեջանի՝ հայկական մշակութային ժառանգության ոչնչացման հետեւողական քայլերը: Նշենք, որ Ադրբեջանի վերահսկողության տակ հայտնվելուց հե-

տո՝ 1997–2006 թվականներին, Նախիջեւանի ողջ տարածքում ոչնչացվեցին 89 եկեղեցի, մոտավորապես 6000 խաչքար եւ ավելի քան 22 000 տապանաքար:

Համաժողովն ընդգծեց, որ Ադրբեջանի կառավարությունը պետք է դադարեցնի պատմական հուշարձաններից հայկական հետ-

քերը վերացնող աշխատանքային խմբի գործունեությունը եւ թուլատրի ՅՈՒՆԵՍԿՕ-ի միջազգային մշակութային ժառանգության մասնագիտական ու մոնիտորինգի անկախ խմբերին եւ համապատասխան այլ կազմակերպություններին հետեւել Լեռնային Ղարաբաղի հուշարձանների

ներկա վիճակին: Համապատասխան շահագրգիռ կողմերը, մասնավորապես ԵԱՀԿ Մինսկի խմբի համանախագահները պետք է ապահովեն աղթատեղիներ եւ գերեզմանատներ մուտք գործելու հիմնարար իրավունքները:

Կազմակերպիչները խոստացան շարունակել համատեղ աշխատանքները եւ համաժողովի ավարտից հետո ներկայացնել գործողությունների հստակ ծրագիր Մայր Աթոռ Սուրբ Էջմիածնում, Ավստրիայում, Ռուսաստանի Դաշնությունում եւ ԱՄՆ-ում կայացած համաժողովների ժամանակ բարձրաձայնված խնդիրների ու դրանց լուծումների վերաբերյալ:

Միջազգային հանրությունը պետք է անհրաժեշտ ճնշում գործադրի ապահովելու Ադրբեջանի ստանձնած միջազգային պարտավորությունների կատարումը՝ մարդու հիմնարար իրավունքների եւ ազատությունների պաշտպանության, ներառյալ մշակութային ժառանգության պահպանության ուղղությամբ:

Մայր Աթոռ Սուրբ Էջմիածնի տեղեկատվական համակարգ

Հրեշտակներ ու հրեշտակապետներ

Երկնային վերին զորքի ներկայացուցիչները, որ հրեշտակ են կոչվում, ըստ իրենց իսկ անվան մեկնաբանության, պատգամաբերներ են սպասավորներ են (եբր.՝ «պատգամավոր, դեսպան»): Հրեշտակները հոգեղեն՝ անմյութեղ են էակներ են, որ ստեղծվել են մարդկության արարումից առաջ: Համաձայն Հայ Առաքելական Սուրբ Եկեղեցու հայրերի եւ վարդապետների՝ երկնային, լուսեղեն այդ էակներն արարվել են արարչության առաջին օրը՝ հավիտենական լույսի ստեղծման հետ միասին (Ծմնդ. Ա 3): Ուղղափառ (Օրթոդոքս) Եկեղեցու տեսակետի համաձայն՝ հրեշտակներն ու հրեշտակապետներն արարվել են մախքան վեցօրյա արարչությունը: Հրեշտակներն իրենց քանակով բազմաթիվ են («հազարք հազարաց եւ բիւրք բիւրոց», Դան. Է 10, Հայտ. Ե 10), իսկ բնությամբ՝ սուրբ եւ անմյութեղ են: Հրեշտակների «բնակավայրը» երկինքն է, սակայն ոչ թե մեր այս մյութեղեն, տեսանելի երկինքը, այլ «հոգեւոր», «լուսեղեն» երկնային օթեւանը: Ս. Գրիգոր Տաթևացին, հրեշտակների այս «բնակավայրը» մյուս երկինքների հետ համեմատելով, անվանում է «երկրորդ երկինք»՝ այն զատորոշելով առաջին՝ «տեսանելի», եւ երրորդ՝ «իմանալի» երկինքներից: Ի դեպ, այս վերջին՝ «երրորդ երկինքում», համաձայն հայոց վարդապետի տեսության, բնակվում է Սուրբ Երրորդությունը:

Հրեշտակների հիմնական առաքելու-

թյունն Աստծու անընդհատ, մշտնջենավոր փառաբանությունն է: Աստծու հրահանգով նրանք կոչված են նաեւ մարդ արարածի սպասավորելու: Հետեւաբար նրանք պարզապես հոգիներ չեն, այլ սպասարկող հոգիներ, որոնք երկնաբնակ լինելով հանդերձ՝ իրենց մասնակցությունն են բերում նաեւ երկրային կյանքին՝ լինելով Աստծու նախախնամության գործիքն ու միջոցը եւ Նրա կողմից ուղարկվելով Իր ժողովրդին ու Իր կամքին ծառայելու: Կա տեսակետ, ըստ որի՝ հրեշտակապետներն ազգերի, իսկ հրեշտակներն անհատների պահապաններն են:

Թեպետ, Սուրբ Գրքի վկայության համաձայն, այս սպասարկու հոգիներն անթիվ ու անհամար են, սակայն գոյություն ունի որոշակի դասակարգում, որի մասին հայտնում է Սուրբ Դիոնիսիոս Արեոպագացին՝ աստվածային հայտնությամբ զրի առնելով եւ հաղորդելով, որ երկնային զորությունները՝ հրեշտակապետներն ու հրեշտակները, բաժանվում են ինը դասակարգերի: Այս յուրօրինակ աստիճանակարգության առնչությամբ Սուրբ Եփրեմ Ասորին ասում է. «Չնայած ծառայող հոգիները երկնքում անեղծ եւ անմահ են, սակայն Աստված հաճել է, որ Իր ծառաները եւս ունենան պետություններ, իշխանություններ եւ արտոնություններ»:

Հրեշտակային այդ ինը դասերը կամ աստիճաններն իրարից զանազանվում են թե՛

իրենց դիրքով եւ թե՛ առաքելությամբ: Համաձայն վերոնշյալ աստիճանակարգության՝ հրեշտակային ինը դասերն են.

ա. Աթոռներ (Ես. 2 1, Եզեկ. Ժ 1, Դան. Է 9, Կող. Ա 16),
բ. Քերովքներ (Ծմնդ. Գ 24, Սաղմ. Ժ 11, ԴԼ 1, Եզեկ. Թ 3, Ժ 1–20, Ելք Ի 18, Թվ. Է 89, Ա Թագ. Դ 4, Բ Թագ. 2 2),

գ. Սերովքներ (Ես. 2 2, 6),
դ. Տերություններ (Կող. Ա 16),
ե. Չորություններ,
զ. Իշխանություններ (Կող. Ա 16),
է. Պետություններ (Կող. Ա 16),
ը. Հրեշտակապետներ,
թ. Հրեշտակներ:

Համաձայն հայրաբանական ընկալման՝ առաջին երեք դասերին պատկանող հրեշտակներն ամենամոտն են Աստծուն, ուստի անմիջականորեն իսկ ողողվում են Սուրբ Երրորդությունից ճառագող շնորհների լույսով: Մյուս երեք դասերի ներկայացուցիչները միջին դիրք են զբաղեցնում եւ իրենց շնորհի լույսը ստանում են առաջին դասերի ներկայացուցիչների միջոցով՝ իրենք էլ իրենց հերթին այդ շնորհները հաղորդելով առավել ստորին դիրքում գտնվող հրեշտակային դասերին: Այդ վերջին երեք դասերն իրենց դիրքով առավել մոտ են մարդկությանը՝ ի վերուստ տրված շնորհների եւ զորության համեմատ սպասավորելով մեզ: Եկեղեցական հայրերի վկայության համաձայն՝ Եկեղեցում «Աթոռներ»-ի դասին պատկանող հրեշտակների խորհուրդը

կրում են նահապետները: «Քերովքներ»-ի երկրային փոխանորդներն են օրենսդիրները: Աստվածաշնչյան դատավորները խորհրդանշում են «Սերովքներ»-ին, քահանաները՝ «Տերություններ»-ին, թագավորները՝ «Չորություններ»-ին, մարգարեները՝ «Իշխանություններ»-ին, առաքյալները՝ «Պետություններ»-ին, ավետարանիչները՝ «Հրեշտակապետներ»-ին, իսկ վարդապետներն էլ՝ «Հրեշտակներ»-ին:

Ս. Գրիգոր Տաթևացին նշում է, որ ամեն մարդ դեռեւս մոր որովայնում, բանական հոգի ստանալուց ի վեր, ունենում է իր պահապան հրեշտակը: Մեկ այլ տեսակետի համաձայն, որի կրողը Ռուս Ուղղափառ Եկեղեցին է, մարդու պահապան հրեշտակը նրան է տրվում միայն մկրտության ժամանակ, ինչից եւ ենթադրաբար բխում է, որ պահապան հրեշտակ կարող են ունենալ միայն քրիստոնյաները. մինչդեռ հրեշտակների գոյության մասին խոսվում է աշխարհի տարբեր կրոններում: Օրինակ՝ զրադաշտականության մեջ հայտնի է գերբնական, թեւավոր մի ուժ, որը մարդու ծննդյան օրվանից ուղեկցում է նրան՝ դառնալով յուրաքանչյուր բանական արարածի խիղճը: Մահմեդականության մեջ այն տեսակետն է արտահայտվում, որ յուրաքանչյուր մարդու մի ուսին մշտապես նստած է մի հրեշտակ, որը գրանցում է տվյալ անձի բարի գործերը, իսկ մյուս ուսին՝ վատ արարքները գրի առնող հրեշտակը: ➔ էջ 2



← էջ 1

Իսկ ահա քրիստոնեության՝ հրեշտակների առնչվող հարցի շուրջ ունեցած ընկալումը կարելի է ամփոփել աստվածաշնչյան այս մեկ նախադասության մեջ. «Նա Իր հրեշտակներին հոգիներ դարձրեց եւ Իր ծառաներին՝ կրակի բոց» (Եբր. Ա 7): Քրիստոնյաներիս համար ընդունելի է այն տեսակետը, ըստ որի՝ երբ մարդն աղոթում է, նրա պահապան հրեշտակն իր «պաշտպանյալի» աղոթքը տանում-բարձրացնում է երկինք եւ մատուցում Աստծուն: Պահապան հրեշտակը մարդու ուղեկիցը, պահապանն ու օգնականն է նրա ողջ կյանքի ընթացքում:

Ինչ վերաբերում է հրեշտակների սեռին, ապա նշենք, որ մեր Տեր եւ Փրկիչ Հիսուս Քրիստոսի վկայության համաձայն՝ հրեշտակները եւ առհասարակ երկնային բոլոր էակները բնությամբ անսեռ են: Այդ մասին Հիսուս խոսում է մեռելների հարությանն առնչվող դրվագում՝ ասելով. «...հարության ժամանակ ի՞նչ կին եմ առնում եւ ի՞նչ էլ մարդու գնում, այլ կլինեն՝ ինչպես հրեշտակները երկնքում» (Մատթ. ԻԲ 30):

Մեզ հայտնի հրեշտակապետներից յուրաքանչյուրն ունի իր անունը, որը բնութագրում է նրա ծառայությունն ու Աստծու առջեւ ունեցած դիրքը: Ուշագրավ է, որ հրեշտակապետների անուններն ունեն «է» վերջավորությունը, որն Աստվածաշնչում Աստծուն տրվող անվանումներից մեկն է: Մեզ հայտնի են հրեշտակապետների հետեւյալ անունները, որոնցից յուրաքանչյուրը համապատասխանում է նրանց որոշակի կոչմանը. Միքայել՝ «Աստվածաման, Աստծու հզոր», Գաբրիել՝ «Աստծու պատկեր», Ռաֆայել՝ «Աստծու բժշկություն», Անյայել՝ «Աստծու լույս», Ուրիել՝ «Աստծու տեսություն», Դակուել՝ «Ինքն աստվածային», Բարաքիել՝ «Աստվածային սկիզբ», Ադոնիել՝ «Իմ տերն Աստված է», Փանուել՝ «Աստծու հայտնություն»: Ինչպես նշում է Ս. Գրիգոր Աստվածաբանը, «...այս հրեշտակապետները մարդկանց բերում են պատգամներ՝ այդպիսով իրենց ներկայությամբ ու գործողություններով վճռականորեն փոխելով մեր կյանքը»:

Երեք ամենահայտնի հրեշտակապետներն են Միքայելը, Գաբրիելը եւ Ռաֆայելը: Միքայել հրեշտակապետը, որն Աստվածաշնչից մեզ հայտնի է որպես Աստծու ժողովրդի իշխան, Հին Կտակարանում մարտնչում է Իսրայելի թշնամիների, իսկ Նոր Կտակարանում՝ անտեսանելիորեն պայքարում Քրիստոսի Եկեղեցու հակառակորդների դեմ: Հովհաննու Հայտնության գրքում նկարագրվում են երկնքում Միքայել հրեշտակապետի պատերազմն ու հաղթանակը վիշապի՝ սատանայի, ինչպես նաեւ նրա չար գործակիցների դեմ:

Հրեշտակներ ու հրեշտակապետներ

Ուշագրավ է, որ Նոր Կտակարանում «հրեշտակապետ» տիտղոսը տրվում է միայն Միքայելին: Ավելի ուշ արդեն այդ տիտղոսը տարածվում է նաեւ Գաբրիելի եւ Ռաֆայելի վրա: Միքայել հրեշտակապետը, երկնային զորությունների հրամանատարը լինելով, պայքարում է չարի դեմ եւ պաշտպանում բարին: Դա է նշանակում նաեւ հրեշտակապետի անունը. երբ սատանան եւ Աստծու դեմ ապստամբած դեւերի բազմությունը հակառակվում են աստվածային ծրագրերին, Միքայելը նրանց դեմ է դուրս գալիս եւ պաշտպանում այդ ծրագրերի սրբությունը՝ ջերմեռանդորեն բացականչելով՝ «Մի՛ քա էլ», որ նշանակում է՝ «Ո՛վ է Աստծու նման»: Միքայել հրեշտակապետը, Արարչին հավատարիմ հրեշտակների զորքի հրամանատարությունն ստանձնելով, պատերազմում է սատանայի եւ Աստծու դեմ ապստամբած մյուս հրեշտակների դեւերի դեմ ու նրանց վտարում երկնքից:

Այդ ամենից հետո, երբ սատանան փորձում է Արարչի դեմ ունեցած իր վրեժը լուծել Աստծու պատկերն ու նմանությունն ունեցող մարդ արարածից, Միքայել հրեշտակապետն իր պաշտպանության տակ է առնում նաեւ մարդուն: Բացի Հայտնության գրքում առկա հիշատակությունից (տե՛ս Հայտ. ԺԲ 7)՝ Միքայել հրեշտակապետի մասին պատմվում է նաեւ Դանիելի մարգարեության մեջ, ուր Միքայելը հանդես է գալիս որպես «ավագ իշխան» (Դան. Ժ 13, 21, ԺԲ 1), ինչպես նաեւ Հուդա Տյառնեղոր Ընդհանրական նամակում (տե՛ս Հուդա Թ):

Համաձայն քրիստոնեական ավանդության՝ Միքայել հրեշտակապետն է ընդունում հանգուցյալների հոգիները՝ կշռելով ու բաղդատելով մահացածների սրտում եղող բարին ու չարը: Ահա թե ինչու Միքայել հրեշտակապետի խորհրդանշաններն են սուրը եւ կշեռքը՝ հիմնվելով Հետսկի գրքի նշյալ՝ Ե 13–16 հատվածի վրա: Սուրը խորհրդանշում է չարի դեմ պայքարը, իսկ ահա կշեռքը արդարներին ու մեղավորներին դատելու իրավունքով օժտված հրեշտակապետի՝ մարդկանց հոգիներն Աստծու դատաստանին մերկայացնելու խորհուրդն ունի: Ուստի Միքայել հրեշտակապետը հաճախ պատկերվում է այդ երկու խորհրդանշանները միաժամանակ իր ձեռքում պահած:

Առհասարակ բոլոր սրբապատկերներում Միքայել հրեշտակապետը պատկերվում է ոսկեգոծ սպառազի-նությամբ՝ վիշապի կերպարանք ունեցող սատանային շղթայելիս կամ սրահարելիս, կամ՝ բարին ու չարը «չափելու» վերոնշյալ խորհրդաբանության համաձայն՝


կշեռքը ձեռքին բռնած: Սովորաբար կշեռքի մի նժարին պատկերված է լինում մարդը, մյուսին՝ դեւերը, որոնք ամեն կերպ փորձում են իրենց կողմը թեքել կշեռքը: Երբեմն էլ կշեռքի նժարների վրա պատկերվում են մարդու բարի կամ չար մտքերը, խոսքերն ու գործերը խորհրդանշող սպիտակ ու սեւ քարեր: Հայկական պատկերագրության մեջ գերակշռում է այն տեսարանը, երբ Միքայել հրեշտակապետի կշեռքի մի նժարին դրված են բազմաթիվ սեւ քարեր, իսկ մյուսին միայն մեկ սպիտակ քար է դրված. այդ մեկ սպիտակը հակակշռում է այն բազմաթիվ սեւ քարերին, որքան էլ որ սեւ քարեր պարունակող նժարից կախված դեւերը ջանում են կշեռքի նժարն իրենց կողմը թեքել՝ ապարդյուն վատնելով իրենց ջանքերը:

Նշենք նաեւ մի հետաքրքիր փաստ. Արեւելքում Միքայել հրեշտակապետի նկատմամբ մեծագույն պատկառանք էր ձեւավորվել: Արդեն Թ դարում միայն Կ. Պոլիս քաղաքում եւ քաղաքային արվարձաններում Միքայել հրեշտակապետի անունը կրող երեսուն վանք ու եկեղեցի կային:

Ռուսական կայսրության մայրաքաղաքում Միքայել հրեշտակապետին է ձոնվել Կրեմլի այն տաճարը, որտեղ կատարվում էին կայսերական հուղարկավորությունները: Իսկ ահա Արեւմուտքում հրեշտակապետի աշխարհահռչակ սրբավայրերից է Սուրբ Միքայելի լեռ կոչվող վանքը Նորմանդիայում: Ամենամշանավոր ու կարեւորագույն սրբավայրը, սակայն, գտնվում է իտալական թերակղզու հարավարեւելյան հատվածում՝ Գարգանոյի լեռներում:

Գաբրիել հրեշտակապետը, որ դեռեւս Հին Կտակարանից սկսած՝ հանդես է գալիս Փրկչի գալստյանն առնչվող խորհուրդները մարգարեներին բացահայտելու եւ մեկնաբանելու առաքելությամբ, իր որոշակի գործառնությամբ է իրականացնում նաեւ Նոր Կտակարանում՝ Մարիամ Աստվածածնին հաղորդելով աշխարհի մեծագույն ավետիսը: Ինչ վերաբերում է հրեշտակապետի անվանը, ապա պետք է նշել, որ թպետ Ս. Գրիգոր Տաթևացին Գաբրիել անունը թարգմանում է որպես «Աստծու պատկեր», սակայն ընդունված է նաեւ այն տեսակետը, ըստ որի՝ Գաբրիել նշանակում է Աստծու մարդ՝ «Այդ Աստուծոյ» կամ «Զօրութիւն Աստուծոյ»:

Հրեական մատենագրության մեջ Գաբրիել հրեշտակապետը ներկայացվում է Տիրոջ գահի առջեւ մշտապես կանգնած՝ մարդկանց օրհնելիս կամ նրանց համար բարեխոսելիս: Ինչպես հայտնի է Ենովքի պարականոն գրքից, Գաբրիել հրեշտակապետը հատուկ պատասխանատվություն է



կրում դրախտի համար: Մյուս հրեշտակապետների հետ Գաբրիելը եւս պետք է մասնակցի վերջին դատաստանին, որի մասին խոսվում է նաեւ Նոր Կտակարանում (տե՛ս Հայտ. Ը 2): Գաբրիել հրեշտակապետը վերջին դատաստանի ժամանակ պիտի հնչեցնի մահացածների հարության փողը. «Գաբրիելեան փողն զոչէ, սուրբք ամենայն անդր հաւաքին» (Ս. Ներսէս Շնորհալի): Գաբրիել հրեշտակապետն Աստվածաշնչում հիշատակվում է Դանիելի մարգարեության մեջ (Դան. Ը 16, Թ 21)՝ որպես արագաշարժ եւ թռչող էակ, որն առաջացնում է մարգարեի զարմանքը (Դան. Ը 17): Իսկ ահա Զաքարիային Գաբրիել հրեշտակապետը բացահայտում է իր ով լինելը՝ ասելով. «Ես Գաբրիելն եմ, որ կանգնում եմ Աստծու առաջ. ես ուղարկվեցի խոսելու քեզ հետ եւ այդ բանը քեզ ավետելու» (Ղուկ. Ա 19): Թե՛ այս, թե՛ Աստվածածնի ավետիսի (Ղուկ. Ա 26–35) դրվագները ցույց են տալիս, որ Գաբրիել հրեշտակապետն ամմիջականորեն կատարում է Աստծու հրահանգներն ու տնօրինությունները: Գաբրիել հրեշտակապետը պատկերվում է փողը ձեռքին կամ շուրթերին, իսկ ավետման դրվագներում՝ ձեռքին ճերմակ ծաղիկ բռնած:

Առավել սակավ են Ռաֆայել հրեշտակապետի մասին տեղեկությունները: Ռաֆայել անվանը տրվում է երկու բացատրություն, որոնք, ի դեպ, նույն իմաստն են արտահայտում. առաջին բացատրության համաձայն՝ Ռաֆայել նշանակում է Աստծու բժշկություն, իսկ երկրորդի՝ Աստված բժշկում է:

Ռաֆայել հրեշտակապետն Աստվածաշնչում հիշատակվում է միայն Տոբիթի երկրորդականոն գրքում (տե՛ս Տոբ. Ե 5–6), որտեղ հրեշտակապետը Տոբիայի ճամփորդության ժամանակ ընկերակցում է նրան եւ բժշկում է Տոբիթին ու Տոբիի ապագա կնոջը՝ Սառային (Տոբ. Զ 18–21, ԺԱ 13–15), նաեւ երկայնաճում է որպես մարդկանց աղոթքներն Աստծուն առաքող եւ Տիրոջ գահի առջեւ Նրան աղոթքների խունկը անդադար մատուցող հրեշտակապետ (տե՛ս Տոբ. ԺԲ 12–15): Ավանդու-թյան համաձայն՝ հենց Ռաֆայել հրեշտակապետն է իջնում եւ խառնում Սիլվամի ավազանի ջրերը, որպեսզի ջրերի խառնման ժամանակ այնտեղ իջնող հիվանդները բժշկություն գտնեն (տե՛ս Հովհ. Ե 4): Այս հանգամանքով պայմանավորված՝ քրիստոնյաներս Ռաֆայել հրեշտակապետին դիմում ենք հատկապես մարմնական հիվանդություններից Աստծու կամքի համաձայն ապաքինում գտնելու խնդրանքով: Սուրբ Ռաֆայել հրեշտակապետը նաեւ ընտանիքի անդամների միջեւ սեր ու խաղաղություն հաստատելու համար պատասխանատու սպասավորն է:

Գեորգ սրկ. ԿԱՐԱՊԵՏՅԱՆ



Սուրբ Գաբրիել եւ Միքայել հրեշտակապետների եւ ողջ երկնային զորքի հիշատակության տոնի առթիվ



Լույս-երկնքում ձեր անդադրում,
Հրեշտակային ձայնով բարի,
Երկնավոր Հորն օրհնաբանող
Զորք լուսեղեն, անեղական,
Որ քաղցրաձայն ձեր բարբառով,
Հնչեղությամբ անլռելի
Քարոզում եք բարիք ու սեր,
Եվ բնությամբ անապական
Դուք ճախրում եք՝ միշտ դեպի վեր
Առաքելով աղոթքը մեր,
Ո՛վ բազմաչաք քերովբեներ,
Սերովբեներ դուք բազմաթեւ
Ու բազմաբյուր լոյս-հոգիներ,
Բարեխոսե՛ք Սուրբ Արքային,
Որ թողություն Նա պարգեւի
Հոգիներին մեր բազմամեղ
Ու մեղքերին մեր բյուրաբյուր...
Եվ աղերսե՛ք,

Ո՛վ անգմին
Զորություններ հրեշտակային,
Որ նաեւ մենք
Երեսրբյան օրհներգությամբ
Փանքը երգենք Երրորդության,
Դուք՝ անարվեստ Գահի Բարձրալի,
Բարեկամներ դուք մարդկության
Եվ աշխարհի պահապաններ՝
Միջնորդ մահվան ու հարության,
Սուրբ Միքայել ու Գաբրիել,
Բարեխոսե՛ք Փրկչին համայն,
Որ չլռի աղոթքը մեր,
Այլ զորությամբ աստվածաման
Թեւեր առնի ու ճախրի վեր՝
Դեպի Գահը սուրբ Բարձրալի,
Ու բարբառով երեսրբյան
Աստծու փառքը օրհնաբանի...

Դավիթ Անհաղթի՝ Խաչին Նվիրված Ներբողը եւ դրա մեկնությունները

Միջնադարյան հայ մատենագրության որոշ հեղինակներ եւ ստեղծագործություններ իրենց ուրույն տեղն ունեն հայ աստվածաբանական, փիլիսոփայական մտքի պատմության մեջ: Այդ հեղինակներից է Դավիթ Անհաղթը, իսկ ստեղծագործություններից՝ նրա «Ներբողեան ի սուրբ խաչն աստուածընկալ» երկը:

Դավիթ Անհաղթը, հիրավի, միջնադարյան Հայաստանի գիտության հիմնասյուներից մեկն է: Առաքել Սյունեցին (ԺԴ—ԺԵ դդ.) Դավիթ Անհաղթին՝ որպես առաջին հայ մեծ փիլիսոփայի, համեմատում է Մովսես մարգարեի հետ: Դավիթ Անհաղթի կյանքի եւ գրական ժառանգության մասին վկայություններ կան թե՛ պատմիչների երկերում, թե՛ իր հեղինակած աշխատությունների նախադրույթումներում ու մեկնություններում, թե՛ ձեռագրերի հիշատակարաններում: Նրա կերպարն արտացոլվել է նաեւ ժողովրդական բանահյուսության մեջ: Այդուհանդերձ՝ Դավիթ Անհաղթի անձի եւ հոգեւոր ժառանգության հետ կապված բազմաթիվ հարցեր մինչ օրս մնում են չլուծված ու վիճելի: Դավիթ Անհաղթին ընդունված է համարել մեծ իմաստասեր, փիլիսոփայական երկերի հեղինակ ու թարգմանիչ, սակայն միջնադարում նա առավելապես ընկալվել է որպես փիլիսոփա-աստվածաբան եւ աղբյուրների համաձայն՝ «Անհաղթ» պատվանունն ստացել է ոչ միայն փիլիսոփայական, այլ նաեւ դավանաբանական վեճերում հաղթելու համար: Հայոց եկեղեցին Դավիթ Անհաղթին սրբադասել է ոչ միայն որպես փիլիսոփայական, այլ նաեւ աստվածաբանական երկերի՝ մասնավորապես խաչին նվիրված ներբողի հեղինակի:

Նրա «Ներբողեան ի սուրբ խաչն աստուածընկալ» երկն առավել հայտնի է սկսվածքի առաջին բառով՝ «Բարձրացուցեք» անվամբ: Այն շատ սիրված ու տարածված է եղել միջնադարում, ինչի վկայությունն են բազմաթիվ ընդօրինակությունները ծառընտիրներում, դավանաբանական բնույթի ժողովածուներում: «Բարձրացուցեք»-ն ընդարձակված է եղել միջնադարյան Հայաստանի վարդապետարաններում ուսուցանվող երկերի շարքում: Ականավոր տոմարագետ, փիլիսոփա եւ մատենագիր Հովհաննես Սարկավազի (ԺԱ—ԺԲ դդ.) կազմած ուսումնական հաստատություններում հանձնարարելի գրականության ծրագրային ցանկում, որը մեզ է հասել Մխիթար Այրիվանեցու (ԺԳ դ.) միջոցով, Սուրբ Գրքի, Փիլոն Ալեքսանդրացու, Բարսեղ Կեսարացու, Դիոնիսիոս Արեոպագոսի, Գրիգոր Նյուսացու, Գրիգոր Նազիանզացու, Եվսեբ Պոնտացու, Պրոկոլ Դիադոխոսի երկերի կողքին ներառված են նաեւ Դավիթ Անհաղթի «Բարձրացուցեք» եւ «Սահմանք իմաստասիրութեան» երկերը: Ուշագրավ է, որ «Ներբողեան...»-ը Սահակ Պարթևի ու Մեսրոպ Մաշտոցի

«Աղոթամատոյց»-ի եւ Հովհան Մանդակունու «Պատարագամատոյց»-ի հետ գետեղված է «Սուրբ գրեանց» մեջ՝ Նոր Կտակարանից անմիջապես հետո:

«Բարձրացուցեք»-ը մեծ ազդեցություն է ունեցել հայ դավանաբանական-աստվածաբանական մտքի վրա: Հետագա դարերի հայ մատենագիրները մեծապես օգտվել են այս երկից: «Բարձրացուցեք»-ի եւ նրա հեղինակի հանդեպ հետաքրքրությունն աճեց հատկապես ԺԲ—ԺԳ դդ., երբ ստեղծվեցին դրա առանձին «պատճառ»-ներ ու մեկնություններ:

Յոթ մասից բաղկացած սույն հոդվածաշարում կներկայացնենք խաչին նվիրված ներբողի («Բարձրացուցեք») ստեղծման պատմաբանական, հոգեւոր միջավայրը, ներբողի աստվածաբանական վերլուծությունը, դրա ազդեցությունը խաչին նվիրված շարականների եւ ներբողների վրա (Թեոդորոս Քոթեմալոր, Միսայել Եպիսկոպոս, Չաքարիա Ա Չազեցի, Գրիգոր Նարեկացի, Գրիգոր Մագիստրոս), հետագա դարերում ստեղծված մեկնություններն ու պատճառները (Վարդան Հաղբատացի, Դավիթ Քոբայրեցի, Ներսես Շնորհալի, Վարդան Արեւելցի):



Մաս Ա. Խաչին նվիրված ներբողի ստեղծման պատմական միջավայրը

«Բարձրացուցեք»-ի հեղինակի, ստեղծման ժամանակի եւ պատմական միջավայրի մասին հիմնական տեղեկություններն ստանում ենք ներբողի Նախադրությունից, Գյուտ Ա Արախեզացի (461—478 թթ.) կաթողիկոսի եւ Դավիթ փիլիսոփայի նամակներից: Դրանք ընդգրկված են «Տօնապատճառ» ժողովածուում՝ «խաչի տոնի պատճառ»-ի մեջ:

Նախադրության սկզբում նախ շեշտվում են Դավիթ Անհաղթի կատարյալ հմտությունները. «Դավիթ փիլիսոփայ ասացեալ, որ լիապես գիտէ զտեսականն եւ զգործականն, եւ զմասունս մոցա զերկուտասան»: Նախադրության համաձայն՝ Դավիթ Անհաղթը ծնվել է Հարթ գավառի Հերթ գյուղում: Ասվում է, որ նա Սահակ Պարթևի եւ Մեսրոպ Մաշտոցի աշակերտն է, Մովսես Քերթովահոր քրոջ որ-



դին եւ մեկն այն վաթսուներեք տարեկանից, որոնք գրերի գյուտից հետո ընտրվեցին եւ ուղարկվեցին Ալեքսանդրիա, Աթենք ու այլ քաղաքներ՝ իմաստասիրություն, արվեստախոսություն ուսանելու եւ թարգմանություններ կատարելու նպատակով: Ուսման մեկնածուների մեջ Դավիթ Անհաղթի հետ հիշատակվում են Մամբրեն՝ Մովսեսի եղբայրը, Մուշեն, Եղիշեն, Եզնիկը, Արծան եւ Աղան Արծրունիները: Որոշ ժամանակ անց նրանք վերադառնում են Հայաստան: Նախադրության մեջ հիշատակվում են Հայոց Արշակունիների արքայատոհմի անկման նախօրեին եւ հետո տեղի ունեցած իրադարձությունները: Այնուհետեւ խոսվում է ներբողի գրության բուն շարժառիթի մասին. «Յաւուրս վերադիտողութեան Հայոց տեառն Գիւտայ եկին ոմանք ի մահանգէն Անտիոքայ ի գեղջեն, որ կոչի Աւշին, որոց անուանքն Կոստանդին եւ Պետրոս եւ Թեոդորէ»: Հեղինակը խիստ բացասական կերպով է նկարագրում այս անձանց արտաքինը: Ի ցույց մարդկանց՝ նրանք խոշոր հանդերձներ էին կրում, ոտաբոբիկ էին, երեսպաշտի մման պահք էին պահում, նրանց ծնկներն ու ճակատները կոշտացած էին ուղտի մաշկի պես: Անտիոքից եկած այս անձանց վարդապետությունը մուսուլման տարբերվում էր ուղղափառ դավանանքից. նրանք չէին ընդունում Մարիամին՝ որպես աստվածածնի, եւ խաչը՝ որպես Աստծու խաչ: Այսպես՝ երբ Գյուտ Ա Արախեզացի կաթողիկոսը լսում է Դավթի եւ նրա ընկերների գալու մասին (հավանաբար խոսքը վերաբերում է վերջիններիս ուսումնառությունից վերադառնալուն), ուրախանում, մխիթարվում է եւ մամակով դիմում Դավթ Անհաղթին:

Միջնադարյան հեղինակները (Վարդան Հաղբատացի, Դավիթ Քոբայրեցի, Գրիգոր Աբաւյան) այս աղանդավորներին համարում են մետոդականներ: Մեծանուն գիտնականներ Մաղաքիա արք. Օրմանյանը, Երվանդ Տեր-Մինասյանը, Գարեգին Ա Սարգսյանը

նույնպես ընդունում են, որ վերոնշյալ անձինք մետոդականներ էին:

Ներկայացնենք է դարում տեղի ունեցած որոշ իրադարձություններ, որոնք կարելի են «Ներբողեան...»-ի ստեղծման շարժառիթն ընկալելու եւ բովանդակային վերլուծության համար: Ե դարը որոշիչ ժամանակաշրջան էր հայ ժողովրդի պատմության մեջ: Այն սկսվեց հանճարեղ Մեսրոպ Մաշտոցի՝ Հայոց գրերի գյուտով, հայ դպրության սկզբնավորմամբ եւ հայ մշակույթի Ոսկեդարի կերտմամբ: Հայոց Արշակունյաց թագավորության կորստին (428 թ.) հաջորդեց Սասանյան Պարսկաստանի Հազկերտ Բ եւ Պերոզ արքաների՝ անկախությունը կորցրած հայ ժողովրդին կրոնափոխելու, Պերոզի դեպքում՝ նաեւ դավանափոխելու քաղաքականությունը, ինչն էլ հանգեցրեց 450—451 եւ 481—484 թթ. հակապարսկական հզոր ապստամբություններին: Ե դարի երկրորդ կեսը պայքարի ժամանակաշրջան էր, երբ հայ ժողովուրդը ոտքի ելավ՝ պահպանելու նախորդ տասնամյակներում ձեռք բերած արժեքները՝ ձգտելով վերականգնել քաղաքական ու կրոնական անկախությունը: «Սրբոց վարդապետացն Հայոց Մովսէսի եւ Դաւթի Հարցմունքը ըստ երկաբնակացն» երկում այս ժամանակաշրջանն այսպես է բնութագրվում. «Յայսմ ժամու եղեն միաբանութիւն երից կամարարացն առ իրեարս, Սատանայ եւ Քաղկեդոն եւ Յազկերտ»: Հայտնի է, որ Սասանյան Պարսկաստանի հակաքրիստոնեական քաղաքականությունը եւ տնտեսական ճնշումները սրվեցին հատկապես պարսից Հազկերտ Բ թագավորի (439—457 թթ.) օրոք: 450—451 թթ. սկսվեց համաժողովրդական հակապարսկական ապստամբությունը՝ «Հայոց պատերազմը», որի զխավոր ճակատամարտը տեղի ունեցավ 451 թ. Ավարայրի դաշտում: Նույն 451 թվականին գումարվեց Քաղկեդոնի ժողովը, որը սահմանային մշակակություն ունեցավ ոչ միայն Հայ, այլ նաեւ Ընդհանրական եկեղեցու պատմության մեջ:

Վարդանանց պատերազմից հետո Հայ եկեղեցու նկատմամբ պարսիկների հսկողությունն առավել սաստկացավ: Սասանյան Պարսկաստանը փորձում էր թուլացնել Հայ եկեղեցու ազգապահպան դերը, բաժանել Բյուզանդական եկեղեցուց եւ պահել իր վերահսկողության ներքո: Հայոց կաթողիկոսական գահին, ինչպես նաեւ եկեղեցական բարձր պաշտոններում մշակակվում էին պարսից դրածոներ: Այսպես՝ 452—456 թթ. կաթողիկոս է դառնում Մելիտե Մանազկերտացին, իսկ նրան հաջորդում է Մովսես Մանազկերտացին (456—461 թթ.): Վերջինների օրոք սկսեցին հալածվել հայ ազատագրական շարժման կողմնակիցները եւ Ս. Սահակի եւ Ս. Մեսրոպի աշակերտները: 461 թ. Հայոց կաթողիկոս ընտրվեց նրանց կրտսեր աշակերտներից Գյուտը (461—478 թթ.), որը Տայք գավառի Արախեզ գյուղից էր՝ «լի գիտութեամբ հայոյս եւ առաւելեալ յունիւն, յորդասաց բանիւ եւ առատաբոլիս վարդապետութեամբ»: Հավանաբար Պարսկաստանում տիրող խառնակ վիճակի պատճառով էր, որ Պերոզ թագավորը չմիջամտեց կաթողիկոսի ընտրությանը: Մյուս կողմից՝ Պերոզը Հայաստանում իր դիրքերն ամրապնդելու համար պաշտոններ էր տալիս իրեն հավատարիմ նախարարներին: Դազար Փարպեցին պատմում է Գաղիշո Խորխոռունու մասին, որը անհավատարմության եւ բյուզանդական իշխանության հետ գաղտնի կապեր հաստատելու համար Պերոզի առջեւ ամբաստանում է Գյուտ Ա Արախեզացի կաթողիկոսին, հայ նախարարներին ու հոգեւորականներին: 471 թ. Գյուտ Ա Արախեզացին Պերոզի հրամանով կանչվում է Տիգրան՝ պատասխան տալու Գաղիշոյի՝ բյուզանդացիների հետ գաղտնի հարաբերություններ ունենալու մեղադրանքներին: Պերոզն անձամբ չի հանդիպում Գյուտ Ա կաթողիկոսին, այլ Աշտուտ գորավարի որդի Յըզատվմնասայ Միհրանի միջոցով նրան է փոխանցում Գաղիշոյի մեղադրանքները: Հայոց կաթողիկոսը համարձակորեն պատասխանում է վերջինիս՝ իր պատմության հանդերձներն այնտեղից բերելու անհրաժեշտությամբ: Պերոզը Գյուտին առաջարկում է հրովարտակով հաստատել կաթողիկոսական պաշտոնը եւ պատվով ուղարկել Հայաստան, եթե վերջինս ենթարկվի իր կամքին ու երկրպագի արեգակին, այլապես սպառնում է զրկել կաթողիկոսական աթոռից: Գյուտը պատասխանում է, որ թագավորը կարող է իրեն թույլ չտալ այլեւս հովվապետել Հայոց եկեղեցին, դրանով ինքը կազատվի աշխարհատանց հոգսերից եւ փոխարենը կաղոթի, իսկ եպիսկոպոսական ձեռնադրության պատվով իրենից չեն կարող խլել ոչ արքաները, ոչ իշխանները, ոչ էլ մույնիսկ մահը: Կաթողիկոսը Պերոզի հրամանով արգելափակվում է Տիգրանում. որոշ ժամանակ այնտեղ մնալուց հետո վերադառնում է Հայաստան եւ առանձնանում Ռթմուն, որտեղ է ապրում է մինչեւ իր մահը՝ 478 թ.:

Հայկական, ինչպես նաեւ օտար աղբյուրներում վկայություններ կան Գյուտ Ա Արախեզացու կաթողիկոսության եւ Պերոզի գահակալության շրջանում Հայաստանում վերջինիս կողմից հովանավորվող մետոդականների գործունեության մասին: ➔ էջ 5



Կյանքն առանց հավատքի

«Հաւանք, հաւատքն է միայն, որուն երկնային ուժին առջև լեռնանման դժուարութիւնք կը հարթուին, նոյն իսկ մահն իր աւարը ետ կուտայ, իր խորտակուի սեւ պատուարը անոր, կը պատռի մռայլ վարագոյրը կեանքին»:

Ներսէս վրդ. Դանիէլեանց

Րդի աշխարհում գիտական առաջընթացը, տեխնոլոգիական նորագույն նվաճումները թելադրում են այլ հետաքրքրություններ եւ պահանջներ: Ակնհայտ է, որ փոխվել են արժեհամակարգերը, պատկերացումներն ու մոտեցումները, փոխվել է նաեւ հասարակության վերաբերմունքը տպագիր գրքի նկատմամբ, որին այսօր փոխարինում են էլեկտրոնային տարատեսակ կայքերը: Սակայն իրողություն է, որ տպագրության գյուտը դարձավ մարդկային մտքի հրետամին, իսկ գիրքը՝ այն ամանց արժեքը, որի շնորհիվ վերապրեցինք մախորդ դարերի պատմությունը, դարձանք հոգեւոր արժեքների կրողն ու փոխանցողը: Ահա այս գիտակցումով է առաջնորդվում Հայ Եկեղեցին՝ հավատարիմ մնալով տպագիր գրքի հանդեպ ունեցած իր ավանդական վերաբերմունքին:

Մայր Աթոռի հրատարակչական բաժնի նախաձեռնությամբ 2018 թ. լույս տեսավ հայ մահատակ հոգեւորականներից մեկի՝ Ներսէս վրդ. Դանիէլեանցի քարոզգիրքը (Ներսէս վրդ. Դանիէլեանց, Կեանքն առանց հաւատքի, Բ հրատ., կազմ.՝ Աթուր սրկ. Գէորգեան, խմբ.՝ Անդրէաս աբղ. Եզեկեան, հտ. Ա. Ս. Էջմիածին, 2018, 120 էջ):

Մեծի Տանն Կիլիկիո կաթողիկոսության միաբան Ներսէս վրդ. Դանիէլեանցն այն քիչ հայտնի մտավորական-հոգեւորականներից է, որոնց ստեղծագործություններն ասես խնամքով պահված գանձեր լինեն, որոնք բացահայտելիս հոգիդ անասելի խաղաղությամբ է լցվում: Հոգեւոր սպասավորությանը զուգահեռ՝ Հայ Եկեղեցու վարդապետը ծավալել է նաեւ մանկավարժական ու զրական գործունեություն: Ներսէս վրդ. Դանիէլեանցի «Կեանքն առանց հաւատքի» (Վիեննա, 1903 թ.) եւ «Կաթիլ մը ջուր այրած սրտերու» (Կ. Պոլիս, 1912 թ.) քարոզգրքերը տպագրվել են դեռեւս նրա կենդանության օրոք: Թողել է նաեւ անտիպ երկեր, որոնք, կարծում ենք, մոռացության չպետք է մատնվեն: Անդրադառնանք «Կեանքն առանց հաւատքի» քարոզգրքի երկրորդ հրատարակությանը, որը հիմնալի հնարավորություն է՝ ծանոթանալու մտավորական-հոգեւորականի քարոզներին,

մտքերին ու գաղափարներին, տարբեր հարցերի շուրջ նրա վերլուծություններին, որոնք այժմեական են եւ ուսանելի:

Նախ մշենք, որ քարոզգրքերը խիստ տարբերվում են գիտական հրատարակություններից իրենց ձեւաչափով, բովանդակությամբ, ոճով, կիրառած լեզվական եւ մեթոդական գործիքակազմով: Տարբեր է նաեւ նպատակը. այն մարդկային հոգու անկեղծ խոսակցությունն է իր «ես»-ի, Աստծու կամ իր նմանի հետ: Այսու, քարոզգրքերը չենք կարող վերլուծել ու արժեւորել ըստ գիտական հաստատված չափորոշիչների, սկզբունքների եւ չափանիշների:

Սույն հրատարակությունը բաղկացած է «Կենսագրական ակնարկ»-ից եւ քսան քարոզից: «Կենսագրական ակնարկ»-ում (էջ 5–12)՝ գրված կազմողի կողմից, համառոտ ներկայացված են հայ հոգեւորականի կյանքն ու գործունեությունը, մեջ են բերված հատվածներ նրա հուշերից: Ներսէս վրդ. Դանիէլեանցը հայտնի է եղել նաեւ «Սասկան Վարդ» կեղծանվամբ, որով նրան «օծել» է Մկրտիչ Ա Վանեցի (1892–1907 թթ.) հայրապետը: Նա, տարբեր ծածկանուններով, աշխատակցել է Կ. Պոլսի եւ Իզմիրի թերթերին՝ հրատարակելով չափաձու ստեղծագործություններ, պատմագիտական, բարոյախրատական ու աստվածաբանական հոդվածներ: Ներսէս վրդ. Դանիէլեանցը մեկն էր Մեծ եղեռնի այն միլիոնավոր նահատակներից, որոնց դիրքը մնացին խոր ձորերում կամ ճանապարհների վրա՝ անթաղ եւ անշիրմ:

Նկատելի է, որ գրքում ընդգրկված քարոզները ներկայացված չեն կանխավ որոշված կարգով եւ կուռ կառուցվածքով. դրանք բովանդակային առումով փոխկապակցված չեն միմյանց ու չեն ենթարկվում ժամանակագրական հաջորդականության սկզբունքին: Այս քարոզները խոսվել են տարբեր տարիներին եւ անդրադառնում են ազգային-եկեղեցական իրադարձություններին, քրիստոնեական հավատին առնչվող տարաբնույթ հարցերին ու խնդիրներին, եկեղեցական տոներին, հոգեւոր սպասավորությանը, հայոց մշակույթին. դրանք նաեւ բացահայտում ու խարկազմում են հայ հասարակության կյանքում տեղ գտած արատավոր երեւոյթները: Քարոզները հեղինակի մտքի, խոհերի, մտորումների, ընկալումների, նաեւ անկեղծ մտափոխության ամբասիր արտացոլանքն են: Այս մասին վկայում է նաեւ ինքը՝ Ներսէս վրդ. Դանիէլեանցը. «Խօսեցայ... ինչ որ մերժեցիք ինձ Աւետարանի ոգին ու մեր հարց հաւատքը, գրեցի՝ ինչ որ զգացի կամ թելադրեց ինձ հայ ժողովուրդին սէրը...» (էջ 13): Այս համառոտ քարոզներում հայ հոգեւորականի խոսքը չափազանց պատկերավոր ու գեղեցիկ է, երբեմն՝ խիստ եւ հատու:

Այսպես՝ խոսելով հայ ժողովրդի պատմական փառահեղ անցյալի մասին՝ հայ մտավորական-հոգեւորականն արտահայտում է իր մտափոխությունը՝ կապված ներկայի եւ ապագայի հետ. «Արեւմուտքէն փչող ամեն տեսակ հովերու հանդէպ շատ լայնօրէն կը բանանք մեր սրտերն ու քսակները, ու այդ հովեր, թունաւոր օծերու պէս, անզգալի կերպով կը սողոսկին, կը մտնեն անարգել մեր բնատոհմիկ ընտանեկան դրախտէն ներս ու անցնելով իբր խորշակ մեր մատող սերունդի հոգիներուն եւ սրտերուն ծաղկաստանի վրայէն՝ կը խարեն, կը խամրեն անոնց բարոյական ու հայրենական սրբէնի զգացումներուն ծաղիկները կենսաբոյր...» (էջ 14): Այս կործանարար վրաձգից փրկվելու համար ինչպէս անցյալում, այնպէս եւ այսօր պետք է կարեւորել ու արժեւորել հայ ժողովրդի գոյության երրորդությունը կազմող սրբավայրերը՝ ընտանիքը, դպրոցն ու եկեղեցին: Ազգապահպանման հոգեւոր պատերազմում կարեւորելով հայ եկեղեցականների դերակատարումը՝ Ներսէս վրդ. Դանիէլեանցը պնդում է, որ պետք է առանձնակի ուշադրություն դարձնել քարոզչությանը, քանզի միայն հավատով «մարդ կրնայ ապրիլ աւ վշտի կեանքը՝ ծախորդութեան մէջ անընկճելի, տառապանքներու հանդէպ մխիթարուած ու մահուան դէմ անվեհեր» (էջ 15):

Առաջին՝ «Կեանքն առանց հաւատքի» վերնագրված քարոզում հեղինակը խոսում է գիտության եւ կրոնի մասին, անդրադառնում դրանց փոխհարաբերությանը: Ըստ



այսմ՝ «...հաւատքն ու կրօնական զգացումը հիմն են մարդուն չափ, յախտեճական են կեանքին պէս». կյանքն առանց հավատքի, ասել է թե՛ մարդն առանց հոգու, սիրտն առանց սիրո եւ զգացմունքի (էջ 19): Իսկ գիտությունը մարդկային մտքի, իմացականության լույսն է, այն ընդլայնում է մեր մտափոխությունը, նրա միջոցով ենք ճանաչում մեզ շրջապատող արտաքին աշխարհը: Գիտական նվաճումների շնորհիվ փոխվում են նյութական կյանքի պայմանները, բարելավվում ապրելու կերպերն ու եղանակները: Մտավորական-հոգեւորականն այստեղ իրավամբ նկատում է, որ եթե անգամ գիտությունն իր հրաշքներով ու հրաշալիքներով, իր նվաճումներով եւ առաջընթացով կատարելության գագաթնակետին էլ հասած լինի, այն չի կարող փոխարինել կրոնին ու հավատքին: Գիտությունը չի կարող սփոփել, մխիթարել երկրային կյանքից, տառապանքներից ու կենցաղային խնդիրներից հոգնաբեկ մարդ արարածին, չի կարող բժշկել նրա վիրավոր հոգին, չի կարող ցրել մահվան թանձր խավարի մամուլով սարսափը: Միթե «քրիստոնէին հաւատքը չէ, որ գոցուած գերեզմանէն անդին ցոյց կու տայ բացուած յախտեճականութեան մը դռները, ուսկից կը ցոյեն, կը կաթկթին սփոփանքի սուրբ ցօղերն անուշակ՝ մեր վշտաբեկ սրտերուն վրայ» (էջ 20):

Հաջորդ՝ «Կեանքին արժեքը» քարոզում Հայ Եկեղեցու վարդապետը խոսում է կյանքի իմաստի մասին, իր տեսանկյունից արժեւորում մարդու եւ քարոզ տարիները, փորձառությունը: Նշենք նաեւ, որ քարոզը խոսվել է Ամանորի առիթով:

«Ամոր ծնունդը» վերնագրով քարոզը նվիրված է քրիստոնեական մեծագույն տոնին՝ Սուրբ Ծննդյանը: Ըստ Ներսէս վրդ. Դանիէլեանցի՝ ապականված ու մեղքերի արժեւորում մարդու եւ քարոզ տարիները, փորձառությունը: Նշենք նաեւ, որ քարոզը խոսվել է Ամանորի առիթով:

«Սրտին խորհուրդը» քարոզում վարդապետն անդրադառնում է մարդու չար եւ բարի մտքերին ու խորհուրդներին, պատկերավոր ներկայացնում դրանց հակադրությունը: Հիմնավորելով չար խորհուրդների վտանգավորությունն ու վնասակարությունը՝ հեղինակը շեշտում է, որ «...վատ ու ստորին խորհուրդներն են, որ կը ժանգոտեն խիղճը, կ'ապականեն սրտին մաքուր զգացողութիւնը, վերջապէս կը մթագնեն մտքին պայծառութիւնը» (էջ 35):

Հաջորդ քարոզները բարոյախրատական բնույթ ունեն: Ներսէս վրդ. Դանիէլեանցն անդրադառնում է հասարակության

կյանքում տեղ գտած արատավոր ու մեղսալի երեւոյթներին, սովորոյթներին: Հեղինակի արգահատանքի խոսքն անխտորոքն ուղղված է հասարակության բոլոր դասերի ներկայացուցիչներին՝ աշխարհական թե հոգեւորական, բարձրաստիճան պաշտոնյա թե ռամիկ: Չաքրելի երեւոյթների տարածման պատճառներից մեկը մարդկային անտարբերությունն է դիմացինի վշտի, սխալների, մոլորության ու անկման հանդեպ: Թեւեւ Ներսէս վրդ. Դանիէլեանցի խոսքը խիստ է, մերկացմող, սակայն նա սեր եւ ներողամտություն է քարոզում մոլորյալների ու անկալների նկատմամբ՝ հուսալով, որ վերջիններս դարձի կգան ու կգտնեն քրիստոնեական կյանքի ճշմարիտ ուղին: Որպէս ասվածի լավագույն հաստատում՝ վարդապետը հիշեցնում է ամառակ որդու մասին աստվածաշնչյան առակը:

Մեկ այլ՝ «Ներէլ, թէ՛ պատժել» վերնագրով քարոզում վարդապետը, զուգահեռներ անցկացնելով Հին եւ Նոր Կտակարանների միջեւ, մեկ անգամ եւս կարեւորում է ներելու կարողությունը՝ այն համարելով քրիստոնեական վարդապետության հոգեւոր գեներ. «Քրիստոնէական կրօնի մեծութիւնն ու վսեմութիւնը՝ սիրոյ, գթութեան եւ ներման սկզբունքին մէջն է, այս երրեակ սուրբ զգացումներն են, որ մարդը կը մօտեցնեն մարդուն եւ մարդն՝ Աստուծոյ» (էջ 70): Ներսէս վրդ. Դանիէլեանցը, Աստվածաշունչ մատյանը վկայակոչելով, մեկ անգամ եւս ընդգծում է, որ այն, ինչ ի գորու չեղավ իրագործելու հիմկտակարանյան օրենքը իր խստությամբ ու պահանջկոտությամբ, Աստծու Որդու՝ Հիսուս Քրիստոսի քարոզած սիրո պատվիրանով իրականություն դարձավ:

Նշյալ քարոզների տրամաբանական շարունակությունն ասես լինի «Գթութեան ոգին» քարոզը, որտեղ համազանգորեն արժեւորվում են մարդկային գթասրտությունն ու ողորմածությունը, իր նմանին օգնելու պատրաստականությունը. «Կեանքի հոգեկան ճգնաժամերուն մէջն է, որ գթութեան զգացումը կ'ընեն մարդը մարդուն համար հրեշտակ մը, որ կը կատարէ Աստուծոյ պաշտօնը...» (էջ 51):

Իր խոսքն առավել ազդեցիկ եւ տպավորիչ դարձնելու համար Ներսէս վրդ. Դանիէլեանցը կիրառել է լեզվական տարբեր միջոցներ՝ համեմատություն, համադրում, փոխաբերություն, հակադրություն: Այսպէս՝ մեկ այլ՝ «Արդարութեան եւ ճշմարտութեան ծարաւիներ» քարոզում համեմատության հրաշալի օրինակ է առկա. «Ինչ որ է բնութեան մէջ արեւն ու իր ջերմութիւնը բուսականութեան համար՝ նոյնն է եւ աւելի արդարութիւնն ու ճշմարտութիւնը մեր բարոյական կեանքին համար...» (էջ 112):

«Անհաւատարիմը» քարոզում Հայ Եկեղեցու վարդապետը հակադրում է հավատարմությունն ու անհավատարմությունը, վստահությունն ու անվստահությունը. պատկերավոր բազմաթիվ օրինակներով նա հիմնավորում է հավատարմության ու վստահության անփոխարինելի դերն ընտանեկան, ընկերային (սոցիալական) կյանքում՝ դրանք համարելով մարդկային հարաբերությունների եւ առնչակցությունների հիմնասյուները (էջ 53–57): ➔ էջ 7



← էջ 3

Դեռեւս 430-ական թթ. Սահակ Ա Պարթևը (387—439 թթ.) եւ Մեսրոպ Մաշտոցը, միանալով 431 թ. Եփեսոսի տիեզերաժողովի դավանությանը, անգիջում պայքար են կազմակերպում Հայաստան մերթափանցած մեստորականների դեմ: Եփեսոսի տիեզերաժողովում դատապարտված եւ Կ. Պոլսից հեռացված Նեստորը հաստատվում է Անտիոքում՝ շարունակելով գաղտնի գործունեություն ծավալել: Այսպես՝ մեստորականները, աստիճանաբար դուրս մղվելով բուն Բյուզանդական կայսրության սահմաններից, հաստատվում են արեւելյան մահաճգնեւում՝ մասնավորապես Եդեսիայում, բայց սկսում են տարածվել գլխավորապես Պարսկաստանում: Հաշ-

Դավիթ Անհաղթի՝ Խաչին Նվիրված Ներբողը եւ դրա մեկնությունները

վի առնելով միջնադարյան հայ եւ օտար աղբյուրների հաղորդած տեղեկությունները՝ կարող ենք եզրակացնել, որ Ե դարի երկրորդ կեսին մեստորականությունը նոր թափ է առնում, եւ Հայ Եկեղեցին կրկին պայքար է սկսում ուղղափառ դավանության պաշտպանության համար: Հավանաբար ուղղակիորեն օգտվելով Պարսից արքայի հովանավորությունից՝ նույն շրջանում Հայաստան մեստորականներ են գալիս ոչ միայն Պարսկաստանից, այլ նաեւ Բյուզանդական կայսրության արեւելյան սահմաններից՝ Անտիոքից: Հետաքրքրական է, սակայն, որ խնդրո առարկա Նախադրության մեջ չի նշվում մեստորականների անունը, այլ միայն. «...արքան մեզ ի մահանգէն Անտիոքայ», մինչդեռ «Բարձրացուցէք»-ի «պատճառ»-ների հեղինակները (Վարդան Հաղբատեցի, Դավիթ Քոբայրեցի), ինչպես հետագայում կտեսնենք, հիշատակում են ոչ միայն մեստորականներին, այլեւ Քաղկեդոնի ժողովը:

Այսպիսով, աղբյուրների համաձայն, Գյուտ Ա Արախեզացի կաթողիկոսը մամակով դիմում է Դավիթ Անհաղթին՝ խնդրելով գրել Հայ Եկեղեցու վարդապետությունը պաշտպանող մի երկ. «...խօսել խորհրդով ի խաչն Քրիստոսի» (մամակների վավերականության խնդիրն այստեղ չենք քննում): Ցույց տալու համար խաչի պաշտամունքի կարեւորությունը՝ մամակագիրն օգտվում է Պողոս առաքյալի խոսքից, թե քրիստոնյան միայն խաչով պետք է պարծենա (Գաղ. 2 14—15. Պողոս առաքյալի այս միտքն է ըն-

կած Խաչի աստվածաբանության հիմքում), եւ գրում. «Զի պաշտելի է մեզ եւ պատուելի եւ պանծալի ըստ Պաւղոսի պարծելի պատուական պսակն Յիսուսի, եւ ի թագն նորոյս Սիոնի»: Նամակի վերջում նշվում է ներբողի պատվիրման հիմնական մպատակը. «...զի բարձցի հերեսիոտաց հերձուածն, եւ խլեսցի յագարակաց փուշք, եւ որոմն սատանայական սերմանց, որ ի մարդ յուսան եւ ոչ յԱստուած»: Դավիթ Անհաղթն իր պատասխան մամակում ընդունում է հայրապետի «աստվածահրաման խնդիրը»: Նա խոնարհաբար հայտնում է իր երկյուղը («սարսեալ սարսափեմ»)՝ թերագնահատելով սեփական կարողությունները («գտանի բան զկարմեր գերագանց խնդիրդ»), սակայն համձն է առնում «աւետարանել հնազանդութեամբ»՝ հայցելով կաթողիկոսի աղոթքները, «զի Բանն Աստուած տացէ բան բանի մերոյ մասին, եւ համճար հմտութեան Հոգին Սուրբ, խորիել խորհրդով եւ խօսել»:

Ուշագրավ ընդհանրություններ են նշմարվում նաեւ «Բարձրացուցէք»-ի եւ Սովսես Խորենացու «Պատմութիւն Հայոց»-ի գրության ժամանակի ու համագամքների միջեւ: Հակապարսկական խմբավորման գլուխ կանգնած Սահակ Բագրատունու համձնարարության մոտավորապես 478 թ. Սովսես Խորենացին սկսում է գրել իր Պատմությունը: Պատմահայրը զարգացնում է «ազգ»-ի գաղափարը՝ պարզաբանելով, թե ովքեր ենք մենք, ինչ անցյալ ունենք՝ փորձելով ժամանակակից սերնդի մեջ բարձրացնել ազգային ինք-



նագիտակցությունը, ոգին, ինչը լիովին համապատասխանում էր հայկական պետականությունը վերականգնելու համար սկսված համաժողովրդական շարժմանը: Պարսկաստանի դեմ ուղղված այդ պայքարն անհրաժեշտ էր հզորացնել նաեւ դավանաբանական առումով: Հայոց աշխարհիկ առաջնորդը՝ Սահակ Բագրատունին, պատվիրում է Սովսես Խորենացուն գրել «Պատմութիւն Հայոց»-ը, իսկ Հայոց հոգեւոր առաջնորդ Գյուտ Ա կաթողիկոսը վերջինիս գործակից Դավիթ փիլիսոփային պատվիրում է գրել Հայ Եկեղեցու դավանանքը պաշտպանող երկ:

Այսպիսով՝ Խաչին Նվիրված ներբողի Նախադրության, Գյուտ Ա Արախեզացի կաթողիկոսի եւ Դավիթ Անհաղթի մամակների տեղե-

կությունները համադրելով պատմական աղբյուրների հետ՝ կարող ենք ասել, որ այս երկը գրել է Սովսես Խորենացու ժամանակակից եւ գործակից Դավիթ փիլիսոփան՝ ընդդեմ Հայաստան մերթափանցած մեստորականների: Թեեւ պատվիրատուն Գյուտ կաթողիկոսն էր, սակայն հնարավոր է, որ Դավիթ Անհաղթն այն ավարտել է, երբ վերջինս արդեն մահացել էր, այսինքն՝ Հովհան Ա Մանդակունու (478—490 թթ.) կաթողիկոսության շրջանում: Հետեւաբար՝ «Ներբողեան...»-ի գրությունը կարելի է թվագրել 478—482 թթ. ընկած ժամանակահատվածով:

Շարունակելի

Արմինե ՄԵԼՈՆՅԱՆ
Պատմական գիտ. թեկնածու

Լեւ Տոլստոյի հոգեհանգիստը հայկական եկեղեցիներում՝ Ամենայն Հայոց Կաթողիկոսի շրջաբերականով

1910 թվականի նոյեմբերին թիֆլիսահայ մամուլի ամենաարժարժեքը թեմաներից մեկը Լեւ Տոլստոյի մահն էր: Ռուս համաճարեղ գրողը վախճանվել էր նոյեմբերի 7-ին, եւ հայկական մամուլն օրեր շարունակ անդրադառնում էր նրա կյանքին, ստեղծագործությանը, աշխարհընկալմանը, կրոնական համոզմունքներին եւ, անշուշտ, այդ օրերին կատարվող իրադարձություններին: Հայ մամուլը, ցնցված Լեւ Տոլստոյի մահվամբ, նրան հռչակում էր «գերմարդ», «մարգարե»: Ուշագրավը, սակայն, ռուս գրողի հարաբերություններն էին Ռուս Ուղղափառ Եկեղեցու հետ:

Հայտնի է, որ դեռեւս 1901 թվականին Ռուս Եկեղեցին բանադրել էր Լեւ Տոլստոյին կրոնական հայացքների համար եւ հեռացրել էկեղեցուց:

Նշանավոր գրողի մահից հետո, ինչպես հայտնում է Թիֆլիսում հրատարակվող «Հորիզոն» թերթը, Ռուս Եկեղեցու սուրբ Սինոդը մինչեւ վերջին պահը բանադրումն ուղղափառ ծիսակարգով կատարելու հիմքեր էր փնտրում: Սակայն Լեւ Տոլստոյի այրու հեռագիրը վերջակետ է դնում բուռն քննարկումներին. գրողն ինքը կյանքի վերջին րոպեներին վճռականապես հրաժարվել էր եկեղեցական ծեսով թաղումից: Սինոդի



որոշմամբ՝ հոգեհանգիստն արգելվում է: Թաղումը լինելու էր քաղաքացիական (տե՛ս «Հորիզոն» (252), 1910, նոյեմբերի 12, էջ 2):

Այսուհանդերձ՝ ռուս մեծ գրողի հոգու հանգստության համար ինչու են աղոթքներ, եւ որքան էլ զարմանալի է՝ այլադավան Հայ Եկեղեցուն: Նման ցանկություն էին հայտնել Լեւ Տոլստոյի մեծությունը գնահատող ռուսաստանաբնակ հայ մտավորականներն ու լիբերալ գաղափարներով տարված հայ ուսանողությունը:

Լեւ Տոլստոյի մահվան հետ կապված այս դրվագին անդրադարձել է ինչպես ժամանակի հայ, այնպես եւ ռուսական մամուլը:

Թիֆլիսահայ լրագրերից քաղ-

ված տեղեկությունների համաձայն՝ առաջին հոգեհանգիստը Մոսկվայի հայկական եկեղեցում կատարվում է նոյեմբերի 7-ի առավոտյան՝ գրողի մահվան գույժն ստանալուց ժամեր անց, ըստ «Սուրհանդակ»-ի՝ «հայկական գաղութի ձեռներեցությամբ» (տե՛ս «Սուրհանդակ» (178), 1910):

«Կայծեր»-ն այս մասին մամուլում համարում է. «Գործակալին դիմել են հոգեհանգիստ կատարելու գրչի մեծ վարպետի համար, քահանան երկարատեւ տատանումներից յետոյ է միայն համաձայնվել» (տե՛ս «Կայծեր», 1910, 14 նոյեմբերի):

Հաջորդ օրը, ինչպես ժամանակի մամուլն է փաստում, հո-

գեհանգստի կարգ է կատարվում նաեւ Սանկտ Պետերբուրգի, հետո՝ Ռուսաստանի հայաբնակ այլ վայրերի հայկական եկեղեցիներում, իսկ որ ամենաուշագրավն է՝ Ամենայն Հայոց Կաթողիկոսի կարգադրությամբ:

Մայր Աթոռ Սուրբ Էջմիածնի պաշտոնական «Արարատ» ամսագրում այս մասին որեւէ հրապարակում չկա:

Տեղեկությունը հաղորդում է «Տարագ»-ը. «Հայոց կաթողիկոսը շրջաբերական հեռագրով բոլոր թեմերի առաջնորդներին պատուիրեց ամենուրեք անարգել կատարել հոգեհանգիստ: Հայ դպրոցը, ընկերութիւնները առանց բացառութեան յարգանք մատուցեցին Գերմարդուն» («Տարագ» 1910, նոյեմբեր):

Թիֆլիսի մեկ այլ՝ «Կայծեր» լրագրից տեղեկանում ենք նաեւ, որ Հայոց հայրապետը մամն հրաման է արձակել ի պատասխան Աստրախանի թեմակալ առաջնորդի դիմումի (տե՛ս «Կայծեր», 1910, 23 նոյեմբերի):

Նկատենք, որ այդ ժամանակ Հայ Եկեղեցին հովվապետում էր Մատթեոս Բ Իզմիրլյանը (1908—1910 թթ.), որն իր մահկանացուն էր կնքելու նույն թվականի դեկտեմբերին:

Հայտնի չէ Ռուս Եկեղեցու ո՛չ հրապարակային եւ ո՛չ էլ հետմաբեմային որեւէ արձագանք Հայ

Եկեղեցու այս քայլին: Իսկ Ռուսական կայսրությանն այդ ամենը հետաքրքրում էր այնքանով, որքանով Լեւ Տոլստոյի մահը եւ մասնավորապես նոյեմբերի 8-ին Սանկտ Պետերբուրգի Ս. Կատարինե հայկական եկեղեցում կատարված հոգեհանգստյան արարողությունն առիթ էին դարձել ուսանողական համընդհանուր հուզումների:

Այսպես՝ Սանկտ Պետերբուրգի պահնորդական բաժանմունքի ղեկավար գնդապետ Ֆոն Կոտենը Ռուսական կայսրության ներքին գործերի նախարար Ստոլիպինին ուղղված զեկուցագրում նշում է, որ Լեւ Տոլստոյի՝ Սանկտ Պետերբուրգի հայկական եկեղեցում տեղի ունեցած հոգեհանգստի արարողության լուրն ակնթարթորեն տարածվել է մայրաքաղաքի ուսանողության շրջանում, եւ մինչ աղոթողները՝ շուրջ 200 հոգի, կհասցնեին ցրվել, եկեղեցին լցվել է համալսարանականներով եւ ուսանողուհիներով: Հայ հոգեւորականները համաձայնել են կրկնել արարողությունը եւս մեկ անգամ եկեղեցում եւ դրանից դուրս գտնվող հազարավոր աղոթողների համար:

Այս երկրորդ հոգեհանգստից հետո Նեսկուլ փողոցում սկիզբ առած ուսանողական ցույցին անդրադառնում է նաեւ ռուսական եւ թիֆլիսահայ մամուլը: ➔ էջ 8

ԴՄԻՏՐԻ ԼԻՍԱՋՈՎ ՆԱՄԱԿՆԵՐ ԲԱՐՈՒ ՄԱՍԻՆ

Սկիզբը՝ թիվ 19–21

Նամակ իններորդ ՇՐԲ Ե ՊԵՏՔ ՎԻՐԱՎՈՐՎԵԼ

Պետք է վիրավորվել միայն այն ժամանակ, երբ ցանկանում եմ ձեզ վիրավորել: Եթե չեմ ցանկանում, իսկ վիրավորանքի պատճառը պատահականությունն է, ապա ինչո՞ւ վիրավորվել:

Առանց զայրամալու պարզաբանել թյուրիմացությունը, եւ վերջ:

Դե, իսկ եթե ցանկանում եմ վիրավորել: Նախքան վիրավորանքին վիրավորանքով պատասխանելը արժե մտածել. պէտք է արդյոք իջնել վիրավորանքի աստիճանի: Չէ՞ որ վիրավորանքը սովորաբար ինչ-որ ցածր տեղում է գտնվում, եւ այն բարձրացնելու համար անհրաժեշտ է դրա աստիճանի խոնարհվել:

Եթե այնուամենայնիվ վճռել եք վիրավորվել, ապա մախ կատարեք մաթեմատիկական ինչ-որ գործողություն՝ համում, բաժանում եւ այլն: Ենթադրենք՝ ձեզ վիրավորել են մի բանի համար, որում դուք միայն մասամբ եք մեղավոր: Ձեր վիրավորանքի զգացումից հանել այն ամենը, ինչը ձեզ չի վերաբերում: Ենթադրենք, որ ձեզ վիրավորել են՝ վեհ մղումներից ելնելով. ձեր զգացումը բաժանեք վիրավորական դիտողություն առաջ բերած վեհ մղումների վրա եւ այլն: Մտքում կատարելով մաթեմատիկական անհրաժեշտ ինչ-որ գործողություն՝ կկարողանաք վիրավորանքին մեծ արժանապատվությամբ պատասխանել, ինչն այնքան վեհ կլինի, որքան քիչ մշակակություն կտաք վիրավորանքին. որոշակի սահմաններում, իհարկե:

Ընդհանուր առմամբ չափից ավելի վիրավորվողությունը խելքի պակասի կամ ինչ-որ բարդացած վարկածության մշան է: Եղեք խելացի:

Անգլիական լավ վարքականոն կա. վիրավորվել միայն այն ժամանակ, երբ ձեզ ցանկանում են վիրավորել. դիտավորյալ են վիրավորում: Պարզ անուշադրության, մոռացկոտության համար (երբեմն տվյալ մարդուն բնորոշ տարիքի, հոգեբանական ինչ-ինչ թերությունների պատճառով) պետք չէ մեղանալ: Ընդհակառակը՝ այդպիսի «մոռացկոտ» մարդու նկատմամբ առանձնահատուկ ուշադրություն ցուցաբերեք. դա կլինի գեղեցիկ եւ վեհամեծ:

Սա այն դեպքում, երբ ձեզ «վիրավորում» են, իսկ ինչպե՞ս վարվել, երբ դուք ինքներդ կարող եք վիրավորել մեկ ուրիշին: Վիրավորվող մարդկանց նկատմամբ անհրաժեշտ է հատկապես ուշադիր լինել: Չէ՞ որ վիրավորվողությունը բնավորության խիստ տանջալից գիծ է:

Նամակ տասներորդ ՇԵՍԱՐԻՏ ԵՎ ԿԵՂՃ ՊԱՏԻՎ

Ես չեմ սիրում սահմանումներ եւ հաճախ պատրաստ չեմ դրանց: Սակայն կարող եմ մատնանշել խղճի եւ պատվի միջեւ առկա որոշ տարբերություններ:

Խղճի եւ պատվի միջեւ կա մեկ էական տարբերություն: Խիղճը միշտ հոգու խորքից է բխում, եւ խղճով այս կամ այն չափով մաքրագործվում են: Խիղճը «տանջում է»: Խիղճը չի լինում կեղծ: Այն լինում է խլացված կամ խիստ չափազանցված (շատ հազվադեպ): Սակայն պատվի վերաբերյալ պատկերացումները լինում են լիովին կեղծ, եւ այդ կեղծ պատկերացումներն ահռելի վնաս են հասցնում հասարակությանը: Նկատի ունեմ այն, ինչ կոչվում է «համազգեստի պատիվ»: Մեզանում կորել է մեր հասարակությանը ոչ բնորոշ այնպիսի մի երեւույթ, ինչպիսին «ազնվական պատիվ» հասկացությունն է, սակայն «համազգեստի պատիվը» մնում է ծանր բեռ: Կարծես մարդը մահացել է, եւ մնացել է միայն համազգեստը, որի վրայից հանվել են շքանշանները, եւ որի տակ այլեւս չի բաբախում խղճմիտ սիրտը:



«Համազգեստի պատիվը» ստիպում է ղեկավարներին պաշտպանել կեղծ կամ արատավոր նախագծեր, պնդել շարունակելու ակնհայտ անհաջող շինարարությունները, պայքարել հուշարձանները պաշտպանող ընկերակցությունների դեմ («մեր շինարարությունն առավել կարելու է») եւ այլն: Կարելի է բերել «համազգեստի պատիվ» մասն պաշտպանման բազմաթիվ օրինակներ:

Իրական պատիվը միշտ խղճի հետ մերդաշնակ է լինում: Կեղծ պատիվը մտապատրանք է անապատում՝ մարդկային (ավելի ճիշտ՝ «չինովնիկական») հոգու բարոյական անապատում:

Նամակ տասնմեկերորդ ՊԱՇՏՈՆԱՍՈՒԹՅԱՆ ՄԱՍԻՆ

Մարդն իր ծննդյան առաջին իսկ օրվանից զարգանում է: Նա ձգտում է դեպի ապագա: Նա ուսանում է, սովորում է իր առջեւ մոր խնդիրներ դնել՝ նույնիսկ այդ չգիտակցելով: Եվ որքան արագ է տիրապետում իր դիրքին կյանքում: Արդեն իսկ կարողանում է գոյալ բռնել եւ առաջին բառերն արտասանել:

Այնուհետեւ երեխա եւ պատանի ժամանակ նույնպես սովորում է:

Եվ արդեն գալիս է սեփական գիտելիքները կիրառելու ժամանակը՝ հասնելու նրան, ինչին ձգտում էր: Հասունություն: Պետք է ներկայով ապրել...

Բայց թափառքը պահպանվում է, եւ ահա սովորելու փոխարեն շատերի համար գալիս է կյանքում դիրք գրավելու ժամանակը: Շարժումը շարունակվում է սովորության ուժով: Մարդն անընդհատ ձգտում է դեպի ապագա, իսկ ապագան այլեւս իրական գիտելիքները չեն, ոչ էլ հմտությունների տիրապետումը, այլ՝ սեփական անձը շահեկանորեն դիրքավորելը: Բովանդակությունը՝ իսկական բովանդակությունը, կորսված է: Ներկա ժամանակը չի գալիս, դեռեւս մնում է դեպի ապագա դատարկ ձգտումը: Այդ իսկ է պաշտոնամոլությունը: Ներքին անհանգստություն, որը մարդուն դարձնում է անձնապես դժբախտ եւ շրջապատողների համար անտանելի:

Նամակ տասներկուերորդ ՄԱՐԴ ՊԵՏՔ Ե ԿԻՐԹ ԼԻՆԻ

Մարդը պետք է կիրթ լինի: Իսկ եթե նրա մասնագիտությունը չի պահանջում կիրթ լինել: Իսկ եթե նա չի կարողացել կրթություն ստանալ. այդպես են դասավորվել հանգամանքները: Իսկ եթե շրջապատող միջավայրը թույլ չի տալիս: Իսկ եթե կիրթ լինելը նրան կդարձնի «սպիտակ ազգավ» իր գործընկերների, ընկերների, հարազատների շրջանում, պարզապես կխանգարի այլ մարդկանց հետ նրա մերձեցմանը:

Ո՛չ, ո՛չ եւ ո՛չ: Կիրթ լինելն անհրաժեշտ է բոլոր հանգամանքներում: Դա պետք է եւ շրջապատողներին, եւ հենց մարդուն:

Դա շատ, շատ կարելու է եւ ամենից առաջ՝ երջանիկ ու երկար ապրելու համար, այո՛, երկար: Քանի որ կիրթ լինելը հավասար է բարոյական առողջությանը, իսկ առողջությունը հարկավոր է երկար ապրելու համար՝ ոչ միայն մարմնապես, այլ նաեւ մտավորապես: Աստվածաշնչում ասված է. «Պատվիր քո հորն ու մորը, որպեսզի բարիք գտնես, եւ երկրի վրա կյանքդ երկար լինի» (Եփ. Զ 2–3, հմմտ. Ելք Ի 12): Դա վերաբերում է ինչպես ողջ ժողովրդին, այնպես եւ առանձին մարդուն: Դա իմաստուն է:

Սակայն ամենից առաջ որոշենք, թե ինչ է կիրթ լինելը, իսկ հետո՝ ինչու է այն կապված երկարակեցության պատվիրանի հետ:

Շատերը մտածում են՝ կիրթ մարդը մա է, ով շատ է կարդացել, լավ կրթություն է ստացել (եւ նույնիսկ գերազանցապես հումանիտար), շատ է ճանապարհորդել, մի քանի լեզու գիտի:

Միեւնույն ժամանակ կարելի է ունենալ այս ամենը եւ լինել ոչ կիրթ, եւ կարելի է մեծավ մասամբ այս ամենից որեւէ բան չունենալ, սակայն այնուամենայնիվ լինել մերքնապես կիրթ մարդ:

Կրթվածությունը չի կարելի շփոթել կիրթ լինելու հետ: Կրթվածությունն ապրում է հին բովանդակությամբ, կիրթ լինելը՝ նորի ստեղծմամբ, եւ հնի՝ որպես նորի գիտակցմամբ:

Ավելին... Ձրկեք իրապես կիրթ մարդուն իր ողջ գիտելիքներից, կրթվածությունից, զրկեք նրան հենց հիշողությունից: Թող մա մոռացած լինի ամեն բան աշխարհում, չիմանա գրականության դասականների, չիիշի արվեստի մեծագույն գործերը, մոռանա պատմական կարելու իրադարձությունները, բայց եթե, այս ամենով հանդերձ, պահպանի մտավոր արժեքների նկատմամբ ընկալունակությունը, գիտելիք ձեռք բերելու սերը, պատմության նկատմամբ հետաքրքրությունը, գեղագիտական հոտառությունը, կարողանա տարբերել արվեստի իրական գործը կոպիտ «բանից»՝ ստեղծված միայն զարմացնելու համար, եթե կարողանա հիմնալ բնության գեղեցկությամբ, հասկանա այլ մարդու բնավորությունն ու անհատականությունը, մտնի նրա դրության մեջ եւ հասկանալով ուրիշին՝ օգնի նրան, չդրսետրի կոպտություն, անտարբերություն, չարախնդություն, մախանձ, այլ ըստ արժանվույն գնահատի նրան, եթե հարգանք դրսետրի անցյալի մշակույթի նկատմամբ, դաստիարակված մարդու հմտություններ, պատասխանատվություն՝ բարոյական հարցեր լուծելիս, հարստությունն ու ճշգրտությունն իր լեզվի՝ խոսակցական եւ գրավոր, ահա հենց մա է կիրթ մարդը:

Կիրթ լինելը ոչ միայն գիտելիքներ ունե-

նալն է, այլ նաեւ ուրիշին հասկանալու ունակությունը: Այն դրսետրվում է հազար ու հազար մանրուքներում. հարգալից վիճաբանելու, սեղանի շուրջ համեստ պահելու կարողությամբ, ուրիշին աննկատ (հենց աննկատ) օգնելու, բնությունը պահպանելու, շուրջբոլորը չաղտոտելու՝ ծխախոտի մնացորդներով կամ հայիոյանքներով, վատ գաղափարներով (դա նույնպես աղբ է, այն էլ ինչպիսի) չաղտոտելու ունակությամբ:

Ես ճանաչում էի ռուսական Դյուսիսում բնակվող գյուղացիների, որոնք իսկապես կիրթ էին: Նրանք զարմանալի մաքրություն էին պահպանում իրենց տներում, գիտեին գնահատել լավ երգերը, կարողանում էին պատմել «իրապատումներ» (այսինքն՝ ինչ պատահել էր իրենց կամ ուրիշների հետ), ապրում էին կանոնակարգված կենցաղով, հյուրասեր էին ու սիրալիր, ըմբռնունով էին վերաբերվում ուրիշի եւ վշտին, եւ ուրախությանը:

Կիրթ լինելը հասկանալու, ընկալելու կարողությունն է, հանդուրժող վերաբերմունքն է աշխարհի եւ մարդկանց նկատմամբ:

Կիրթ լինելը պետք է սեփական անձի մեջ զարգացնել, մարզել՝ մարզել հոգեկան ուժերը, ինչպես մարզում են մարմնականը: Իսկ մարզումը հնարավոր եւ անհրաժեշտ է ցանկացած պայմաններում:

Այն, որ մարմնական ուժի մարզումը նպաստում է երկարակեցությանը, հասկանալի է: Շատ ավելի քիչ են ընկալում, որ երկարակեցությանը համար անհրաժեշտ է նաեւ հոգեւոր ու հոգեկան ուժերի մարզումը:

Բանն այն է, որ շրջապատի նկատմամբ թշնամական եւ չար վերաբերմունքը, ուրիշների հանդեպ կոպտությունն ու անհասկացողությունը՝ հոգեկան եւ հոգեւոր թուլության, մարդու ապրելու անկարողության մշաններ են... Հրմշտում է լեփ-լեցուն ավտոբուսի մեջ թույլ եւ մյարդային մարդը՝ ուժասպառ, ամեն ինչին սխալ արձագանքող: Հարեւանների հետ վիճում է նույնպես ապրել չիմացող, հոգեպես խուլ մարդը: Գեղագիտորեն անըմբռնողունակը նույնպես դժբախտ մարդն է: Ուրիշին չհասկացող մարդը՝ նրան միայն չար նպատակներ վերագրող, միշտ բոլորից մեղացող, նույնպես իր կյանքն աղքատացնող եւ ուրիշներին ապրել խանգարող մարդն է: Հոգեկան թուլությունը հանգեցնում է մարմնական թուլության: Ես բժիշկ չեմ, սակայն դրանում համոզված եմ: Երկարամյա փորձառությունն ինձ համոզել է:

Սիրալիրությունն ու բարությունը մարդուն դարձնում են ոչ միայն մարմնապես առողջ, այլ նաեւ գեղեցիկ: Այո, հենց գեղեցիկ:

Ձայրույթից աղավաղված մարդու դեմքը դառնում է այլանդակ, իսկ չար մարդու շարժումները զուրկ են նրբագեղությունից՝ ոչ թե շինծու նրբագեղությունից, այլ բնական, որը շատ ավելի թանկ է:

Մարդու հասարակական պարտավորությունը կիրթ լինելն է: Դա պարտավորություն է նաեւ սեփական անձի նկատմամբ: Դա նրա անձնական երջանկության եւ նրան շրջապատող ու առ մա (այսինքն՝ նրան ուղղված) «բարյացկամության աուրայի» գրավականն է:

Այն ամենը, ինչի մասին գրուցում են երիտասարդ ընթերցողների հետ այս գրքում, կիրթ լինելու, մարմնական ու բարոյական առողջության, առողջության գեղեցկության կոչ է: Լինենք երկարակյաց՝ որպես մարդիկ եւ որպես ժողովուրդ: Իսկ հոր եւ մոր նկատմամբ հարգանքն անհրաժեշտ է լայն իմաստով ընկալել՝ որպես հարգանք անցյալի մեր ողջ լավագույնի նկատմամբ, անցյալի, որը հայրն ու մայրն է մեր այժմեականության՝ մեծ այժմեականության, որին պատկանելը մեծ երջանկություն է:

Շարունակելի

Ռուսերենից թարգմանությունը՝
Տ. Անդրեաս վրդ. ԵՋԵԿՅԱՆԻ



Սուրբ Հովհաննես Մկրտիչ եկեղեցի (Կանաչ ժամ)

Ս. Հովհաննես Մկրտիչ եկեղեցին (Կանաչ ժամ), համաձայն շինարարական արձանագրության, կառուցվել է 1818 թվականին Արցախի Հանրապետության Շուշիի շրջանի Շուշի քաղաքում՝ նախկին Ղարաբաղ-վոց փայտաշեն եկեղեցու տեղում (տե՛ս *Շահեն Մկրտչյան*, Լեռնային Ղարաբաղի պատմաճարտարապետական հուշարձանները, Երևան, 1988, էջ 227): Եկեղեցու պատի մեջ տեղադրված է նախկին եկեղեցու արձանագրությունը: Այն առավել հայտնի է հետեւյալ անվանումներով՝ Ղարաբաղ-վոց եկեղեցի՝ իբրեւ ակնարկ Շուշիի այն բնակիչների, որոնց միջոցներով կառուցվել է, Կանաչ ժամ՝ այն պատճառով, որ դրա զմբեթները ներկված էին կանաչ գույնով, նաեւ Վերին կամ Նոր թաղի եկեղեցի՝ այն թաղամասի անունով, որը կառուցապատվել է խանական լուծը թոթափելուց անմիջապես հետո: Նշանավոր այս եկեղեցին,

որը գրեթե անեղծ պահպանվել էր, գտնվում է սարահարթի բարձրագույն՝ արեւմտյան հատվածում, որտեղից երեւում է քաղաքի ամբողջ համայնապատկերը (տե՛ս *Շահեն Մկրտչյան*, նշվ. աշխ., էջ 360): Եկեղեցին կառուցված է արեւելք-արեւմուտք առանցքով՝ խաչաձեւ հատակագծով: Կողային ավանդատները բեմի տակ իջեցնելու հետեւանքով արտաքին՝ արեւելյան ճակատապատը կիսակլոր է: Եկեղեցին ու զանգակատունն աչքի են ընկնում ներքին յուրօրինակ հարդարանքով: Այս համազամանքը հուշարձան է առանձնացնում է հայ ճարտարապետական համանման կառույցների շարքում: Եկեղեցուն արեւմուտքից կցված է հետագայում կառուցված զմբեթավոր զանգակատունը, որի մուտքի վերնամասում փորագրված է. «Բաբայն Ստեփանեան Յովնանենց՝ ի յիշատակ հանգուցեալ եղ[բոր] իւրեանց

Մկրտչին, 1847 թվին» արձանագրությունը: Թեւե զանգակատունը, ըստ էության, ձուլված է եկեղեցուն, այնուամենայնիվ, որմնամույթերով որոշ չափով առանձնացված է: Դրանով առավել է ընդգծվում դեպի աղոթասրահ տանող շքամուտքի հանդիսավորությունը: Եկեղեցին եւս որմնամույթերով բաժանված է երկու սրահի: Առաջին՝ քառակուսուն մոտ հատակագծով սրահն ունի երդիկավոր գլխատներին հատուկ զոցվող թաղ, իսկ երկրորդ՝ ուղղանկյուն սրահի շքեղ, սրբատաշ որմնամույթերի վրա բարձրանում է շրջանաձեւ զմբեթը: Եկեղեցու աղոթասրահը, ինչպես երեւում է կառույցի արտաքին գոտակաքվից եւ զանգակատան մուտքի աստիճաններից, շուրջ երկու մետր բարձր է բակի մակարդակից: Ուշագրավ են Ս. Հովհաննես Մկրտիչ եկեղեցու զոցվող թաղերը, հայկական եկեղեցիների զմբեթների համար անսովոր որոշ տարրերը՝ անհամեմատ մեծ բացվածքները, բեմատակն իջեցված ավանդատները, արեւելյան կիսակլոր ճակատապատը: Զմբեթների ճարտարապետական մորամուծությունները նույնպես հարստացրել եւ առավել նշանակալի են դարձրել եկեղեցու գեղարվեստական արժանիքը: Եթե դրան ավելացվի բարձր, կանաչապատ տեղանքը, սրբատաշ եւ կոպտատաշ քարերից խմամքով կանգնեցված եկեղեցու կաթնագույն տեսքը, ապա դժվար չէ կռահել, որ հուշարձանն ունի քաղաքաշինական տեսանկյունից որոշակի կազմակերպող դեր: Շնորհիվ կուռ, վերեւ ձգված զմբեթի ու զանգակատան՝ Ս. Հովհաննես Մկրտիչ եկեղեցին լավ է դիտվում քաղաքի բնակելի՝ գրեթե բոլոր թաղամասերից: Այդ համազամանքն իր որոշակի ազդեցությունն է թողել պաշտամունքային կառուցվածքի վրա՝ թելադրելով եկեղեցու եւ զանգակատան հստակ ուրվագծվող զմբեթային լուծում (տե՛ս *Շահեն Մկրտչյան*, նշվ. աշխ., էջ 356): Աղոթեցանցիների վարչակարգի վերջին տարիներին եկեղեցին վերածվել էր համքային ջրերի ըմպելասրահի: Շուշիի՝ 1992 թ. հերոսական ազատագրումից հետո եկեղեցին վերադարձվեց իր իրական տերերին՝ արցախցիներին: Այնտեղ վերականգնողական աշխատանքներ կատարվեցին, եւ 1995 թ. մայիսին Գարեգին Ա կաթողիկոսի (1995–1999 թթ.) մասնակցությամբ անցկացվեց ժամերգություն (տե՛ս *Շահեն Մկրտչյան*, Շուշի. Ողբերգական ճակատագրի քաղաքը, Երևան, 2008, էջ 241):

Ս. Հովհաննես Մկրտիչ եկեղեցին 2020 թվականի հայ-ադրբեջանական 44-օրյա պատերազմից հետո աղոթեցանական զինված ուժերի կողմից բարբարոսաբար ավերվել է: Քանզվել են եկեղեցու զմբեթն ու զանգակատունը, եւ այն վերջնական ոչնչացումից փրկելու որեւէ երաշխիք չկա: Քաղաքակրթության ծիրից անդին մնացած աղոթեցանցիները՝ իրենց իշխանությունների անմիջական հովանավորչությամբ, բացահայտ խախտում են մարդու իրավունքների վերաբերյալ միջազգային համաձայնագրերը: Այսպես՝ ՄԱԿ-ի գլխավոր ասավայրերի 75-րդ նիստի՝ 2020 թ. դեկտեմբերի 16-ին ընդունված բանաձեւում շեշտվում է.

«9. Այնուհետեւ կոչ է անում բոլոր պետություններին միջոցներ ձեռնարկել եւ ռազմավարություն մշակել՝ ուղղված պաշտամունքային եւ կրոնական վայրերի, գերեզմանատների ու սրբավայրերի նկատմամբ բացարձակ հարգանքի խրախուսմանն ու դրանց պահպանմանը, եւ



ձեռնարկել պաշտպանական միջոցներ այն դեպքերում, երբ դրանք ենթակա են բարբարոսության (վանդալիզմի) կամ ոչնչացման վտանգին» (*Տ. Արարատ քին. Պողոսյան, Արփինե Չանթիկյան*, Հատկություն, թիւ 10-րդ, 2021, Դ, էջ 121–122):

Անտեսելով միջազգային իրավական բոլոր փաստաթղթերն ու համաձայնագրերը՝ աղոթեցանցիները պատերազմի ընթացքում եւ դրա թվացյալ «ավարտից» հետո պղծում, անարգում կամ հիմնահատակ քանդում են հայկական սրբավայրերը, վանքերն ու եկեղեցիները, գերեզմանատները, մշակութային կոթողներն ու հուշարձանները:

Ենմա ՂԱԶԱՐՅԱՆ

Մայր Աթոռ Ս. Էջմիածնի «Վաչե եւ Թամար Մանուկյան» մատենադարան

Կյանքն առանց հավատքի

← էջ 4

Ներսես վրդ. Դանիելյանցն ընդգծում է. «Եթե՛ կայ աշխարհի վրայ սուրբ ուրախութիւն, ճշմարիտ երջանկութիւն մը, հոգ չէ, որ ան քանի մը օր կամ քանի մը ժամ տեւած ըլլայ, այն միայն անոնք կ'ըզգան, որոնց սիրտը կապուած է հաւատարմութեան ու վստահութեան սիրոյ օղակապերովը, որուն բնան չեն կրնար վնասել նախանձի կամ կասկածանքի ժանգերը ժահրոտ» (էջ 56):

«Հացին համար ինչ կ'ընենք» քարոզում խարազանվում են մարդկային արատները՝ նյութապաշտությունը, անազնությունը, ստախոսությունը, ազախությունը: Հեղինակը սրտի ցավով նկատում է, որ «.... մարդ ամէն բան միւթականացուց միւթին համար ու ամոր շուրջը կամ դիմացը իր խիղճը խիճ դարձաւ, հոգին ալ՝ մարմին, որ բնագործ սկսաւ գործել, բան բանակաւնութեամբ....» (էջ 65): Ազահների մասին ասվում է, որ նրանց կյանքը, ըստ էության, ունայն է, հոգեւոր որեւէ արժեքից զուրկ, քանզի «խարդախութեամբ դիզուած ոսկիներուն փայլն իրենց կեանքին արեւն ըրին կամ կուռքը՝ իրենց կոյր հոգիին....» (էջ 66): Նշենք նաեւ, որ Ներսես վրդ. Դանիելյանցի բարոյական-աստվածաբանական շեշտադրումները հետաքրքիր են եւ յուրօրինակ. դրանք ասես մի քանի շերտ ունեն, որոնք ընթերցողը պետք է բացահայտի:

«Արտին ծաղկագարդը» քարոզում Ներսես վրդ. Դանիելյանցը շատ գեղեցիկ զուգահեռներ է անցկացնում բնության զարթոնքի, ծաղկունքի եւ մարդու հոգեւոր նորոգման, ներքին մաքրագործման միջեւ: Նա հարցնում է քրիստոնյային, որը բոլոր հավատացյալների հավաքական կերպարն

է. «....իմչ կ'արժէ բնութեան եւ Աստուծոյ տաճարին ծաղկագարդոյիւն ու փոփոխութիւնները, միմչ դու չես զգար փոփոխութիւն մը քու մէջդ հոգեպէս, եւ սիրտդ իբր անայի անպալատ մը կը մնայ թափուր, ուր չճառագայթէր, չցոլանար սէրը սրբացնող ու աստուածացնող....» (էջ 86):

«Վերջին սեղանը» քարոզում նկարագրելով վերջին ընթրիքը՝ վարդապետը խոսում է սիրո պատվիրանի մոտ՝ մորկտակարանյան բովանդակության մասին, որն ավանդվեց մարդկության Փրկչի կողմից: Այս սիրո վրա է կառուցվել քրիստոնեական եկեղեցին (խոսքը հոգեւոր համայնքի մասին է), որը հիմնադրման սկզբնական շրջանում սոսկալի հալածանքների ենթարկվեց, անկարագրելի հարվածներ ու տառապանք կրեց, սակայն անսասան եւ կանգուն մնաց. «Այն (եկեղեցին) կը մնանի ծովափունքի հաստատ ժայռին, զոր կատաղի ծովին ալիքները շարունակ կ'ապտակեն ու կը հարուածեն, բայց ժայռը աւելի կը փայլի, աւելի կը յղկուի այդ ալիքներէն....» (էջ 91):

«Ահաւոր գիշերը» քարոզում Ներսես վրդ. Դանիելյանցը չափազանց պատկերավոր եւ տպավորիչ է նկարագրում Հիսուս Քրիստոսի խաչելությանը նախորդող իրադարձությունները: Նախ՝ ներկայացնում է ահասարսուռ տագնապի, անասելի երկյուռի եւ սպասումի այն գիշերը, որը պետք է փոխեր մարդկության ողջ պատմության ընթացքն ու իր անջնջելի հետքը թողներ. «Տագնապներուդ (իմա՛ Հիսուս Քրիստոսի) ահաւոր գիշերը ծնաւ կեանք մը մարդուն համար, որ այլ եւս չվախճար մահուան գիշերներէն. գերեզմանդ անմահութեան դուռը բացաւ....» (էջ 98): Քրիստոսի չար-

չարանքներով եւ խաչելությամբ իր լուսնին հասավ փրկագործության խորհուրդը: Ըստ Հայ եկեղեցու վարդապետի՝ Աստծու Որդին եղավ լույսը մեր մտքի, անմահությունը մեր կյանքի, սերը մեր սրտի եւ ճշմարտությունը մեր հոգու. Նրա մահվան ահավոր գիշերը մեզ՝ մահկանացուներիս համար ծնեց անմահության առավուտը (էջ 98):

Նախորդին բովանդակային առունով շարունակում է «Մահ, թէ՛ կեանք» քարոզը՝ խոսված Սուրբ Հարության տոնին: Ներսես վրդ. Դանիելյանցը շեշտում է՝ Քրիստոս Իր հարության բաստատեց, որ մարդու համար մահ չկա. Նրա մահով «....մահուան գաղտնիքը լուծուեցաւ, մահը կեանք ծնաւ, միմչ՝ առաջ կեանքն էր, որ մահ կը ծնէր մարդուն համար....» (էջ 101): Եվ, հիրավի, Աստծու Որդու հարության մահվան պատանքը փոխակերպվեց անմահության պատմունքին, իսկ գերեզմանի մթին անուղղը դարձավ հավիտենական կյանքի ճանապարհը: Կյանքի ճշմարիտ օրինակը մեզ հայտնվեց Քրիստոսի երկրային կյանքով, իսկ Նրա մահվամբ ու հարության մեջ լուծվեց գաղտնիքը մահվան, որի խայթոցից առաջացած արյունոտված վերքերը բուժվեցին, սպիացան Փրկչի վերքերից կաթկթացող արյան ցողերով (էջ 118):

Մեկ անգամ եւս արժեւորելով Աստվածաշունչն ու համեմատելով մյուս գրքերի հետ՝ Ներսես վրդ. Դանիելյանցն այն համարում է քրիստոնյայի կյանքի գիրքը, սրտի նվիրական մատյանը եւ հոգու անքիժ հայելին: Աստվածաշունչ՝ մատյանն անանց գանձ է, որը չի ենթարկվում ժամանակի «սպառնալիքին»: Վարդապետը գրում է. «Աւետարանն այն մաքուր ու սուրբ գետակն է, ուր

մարդ աշխարհի կենցաղին մէջ աղտոտած կեանքին բիծն ու աղտերը կը լուայ. ան տրտմածներուն մխիթարանքն է, տառապեալներուն՝ սփոփանքը, խթան մը՝ սուտ իմաստուն կարծեալներուն բրտացած զգացումներուն, խաւարամիտներուն՝ լոյսը....» (էջ 106–107):

Այս հրատարակության մեջ ընդգրկված քարոզներն ունեն աստվածաբանական, բարոյախրատական բնույթ: Կարծում ենք՝ քարոզխոսությանն առնչվող ցանկացած նյութ պետք է ծառայի որոշակի նպատակների՝ ուղղորդի ընթերցողի միտքը դեպի քրիստոնեական բարոյական արժեքաչափ, ներկայացնի Քրիստոսի ճշմարիտ վարդապետությունը, հոգեկան խաղաղություն պարգևի. Ներսես վրդ. Դանիելյանցն իր այս քարոզգրքով թերեւս հաջողությամբ լուծել է վերոնշյալ խնդիրները: Քարոզգիրքը ծավալուն չէ. հեղինակի խոսքը գեղեցիկ եւ ազդեցիկ է, բառապաշարը՝ հարուստ եւ յուրօրինակ: Քարոզները տարաբովանդակ են, չեն կրկնում միմյանց, սակայն դրանցում նշմարվում են հեղինակի հիմնական նպատակն ու ասելիքը: Սույն գիրքը վարդապետի հոգու ինքնաբուխ եւ անկեղծ խոսքն է՝ քրիստոնեական հավատի մի տպավորիչ քարոզ. «Կեանքին գաղտնիքը հաւատքով միայն կրնայ լուծուիլ. հաւատքը կեանքն իսկ է, կեանքը՝ յոյս, եւ յոյսը՝ սէր. առանց այս երրորդութեան ոչ կեանք կայ իրական եւ ոչ երջանկութիւն տեւական: Հաւատացէ՛ք՝ պիտի յուսաք, յուսացէ՛ք՝ պիտի սիրէք, սիրեցէ՛ք՝ պիտի ապրիք....» (էջ 23):

Աստղիկ ՉԱՆԹԻԿՅԱՆ



Մեր վազքը

20-րդ դարի մշակմամբ գրող Յոհան Մաթեուսյանը ծնվել է 1935 թվականին: Գրականության ասպարեզ է մուտք գործել դարի 60-ական թվականներին՝ իր գրչով մոր շունչ տալով արձակին: Յոհան Մաթեուսյանի շնորհիվ հայ գրականության մեջ հայտնվեց մոր հերոս, որի խնդիրն էր՝ շրջանցելով հեշտ ու շվայտ կյանքը՝ հասկանալ գյուղական առօրյայի դժվարություններն ու ծանրությունը: Յայ գրականությունը դարձավ առավել ընդգրկուն, երբ սկսեց քննել կյանքի այն կողմերը, որոնք դուրս էին մնացել ուշադրության շրջագծից: Արձակի այս շարժման մեջ մեծ ներդրում ունեցավ Յոհան Մաթեուսյանը: Նրա խոսքը որքան ոյուրին, նույնքան էլ դժվար է հասկանալ: Յոհան Մաթեուսյանի ստեղծագործություններում արհամարհված են այն հերոսները, որոնք դժվարություններից խուսափելով լքում, թողնում են գյուղը, ծխարում քաղաքներում, որտեղ էլ նրանց հիշողության մեջ փլուզվում է անցյալի հայրենի տունը, մոռացվում են մանկության տարիները, եւ ի վերջո՝ ոչնչանում ամեն բան:

Գրողի մտքի հայրենիքն ու հանգրվանը գյուղը են գյուղական միջավայրն են, որոնք են մաթեուսյանական արվեստի ինքնօրինակ դրսևորումը, մտածելակերպի դիմագիծը, ընթերցողի հետ խոսելու ձևը, մեկնակետն ու ավարտն են... եւ ի վերջո՝ հաղթանակը:

«Մեր վազքը» պատմվածքն սկսվում է գյուղական կյանքի եւ գյուղում տիրող ծանր ժամանակների հետզհետե զարգացող նկարագրությամբ, որը հաջորդող էջերում առավել պատկերավոր եւ հուզիչ է դառնում. «...պատերազմի օրերն էին... իսկ մեր հայրերը ռազմաճակատում էին»: Յոհան Մաթեուսյանը վեր է հանում գյուղական կյանքի բոլոր դժվարությունները, տալիս գյուղում արմատավորված «վախվորած» մտածելակերպի իրական բնութագիրը. «Մահը չէր հասկանա, իբր, որ օտարի անվան տակ հայի տղա է, ու ետ կդառնար ձեռքերը պարապ»: Այստեղ են ուրվագծվում հերոսի մտածելակերպի

սահմանները, բացահայտվում նրա հոգեկան ապրումներն ու ձգտումները, սակայն հարցն առավել ընդգրկուն է դառնում, երբ սկսում ենք որոնել ստեղծված իրավիճակի իրական պատճառը, որը տվյալ դեպքում հեղինակն իսկ բացահայտում է՝ «...նրա եղբայրները դառնալիս էին եղել մեկ տարեկան ու մեռնելիս...»: Առաջին հայացքից պատմվածքում վառ երանգներով դեռ գոյատևում են «պահպանողական ավանդույթները», չէ՞ որ «...պառավները նրա մորը խորհուրդ էին տվել երեխաների վրա թուրքի ու քրդի մի օտար անուն դնել»:

Հաջորդող հատվածներում գործողությունները կառուցվում են զարգանում են Օտարի ու նրա դասարանի շրջանակում. այստեղ են սկսվում ծիծաղը, քմիծաղը, ծաղրն ու արհամարհանքը, այստեղ է Մադաթի մեջ արթնանում կենդանին եւ փորձում խեղդել Օտարին... չէ՞ որ նա օտար էր: Այստեղ է նրանց մեջ հառնում «եսասիրություն» կոչվածն իր բոլոր դրսևորումներով: Արդյունքում՝ ոտնահարվում է Օտարը՝ որպես ընկեր եւ առհասարակ որպես մարդ: Օտարը նրանց մամն չէր... նրանցից էր, բայց միաժամանակ տարբերվում էր նրանցից: Եվ այս է խոցում փոքրիկ հերոսին՝ անտեսելով նրա խեղճությունն ու հորը. «Օտարի հոր սիրտը հիվանդ էր. նվում էր ու չէր մեռնում, նվում-նվում էր ու չէր մեռնում»: Փոքրիկ Արտավազդի եւ նրա հիվանդ հոր միակ հույսն ընտանիքի անգրագետ մայրն էր: Ստեղծված իրավիճակը եւ հատկապես Օտարին հասկանալու համար տեղին է հիշել Հովհաննես Ծիրազի խոսքերը.

*Մեր հույսի դուռն է մայրս...
Մեր հերն ու մերն է մայրս...
Մայրս, մեր հացն է մայրս...*

Պատերազմ էր, դատարկություն: Գյուղում տղամարդկանցից միայն Օտարի հայրն էր մնացել, հիվանդ էր... նվում էր, բայց չէր մեռնում: Նաեւ սրանից էին ծնվել Օտարի նկատմամբ այն արհամարհանքն ու հակակրանքը, որոնց առջեւ անգոր էր, մեռնակ, ամաչում էր. չէ՞ որ բոլորի հայրերն

այնտեղ են պատերազմում, իսկ իր հայրը... Հիվանդությունն իր ողջ ծանրությամբ մաշում էր Օտարի հորը: Նա ամաչում էր, որ գյուղի միակ տղամարդն է. հաճախ իրեն արդարացնելու համար «...մայրերի ձեռքից կացինը վերցնում էր, որպեսզի ինքն աներ փայտ ջարդելու տղամարդու այդ գործը»: Այստեղ հեղինակը զարգացնում է գոյության պայքարի հիմնախնդիրը, որը հետզհետե հասնում է իր գագաթնակետին, սակայն լուծում չի ստանում:


«Մեր վազքը» պատմվածքում նկատելի է, որ գոյության պայքարն ընթանում է հետեւյալ փոխկապակցված հաջորդականությամբ. ստեղծագործության սկզբում Արտավազդին ապրեցնելու համար ծնողները, պայքարելով մահվան դեմ, նրան թաքցնում են Օտար անվան տակ, այսպիսով՝ Արտավազդին փոխարինում է Օտարը: Օտարի հայրը «պայքարում էր» հիվանդ սրտի դեմ: Ռազմագիտության ուսուցչուհին իր մահացած եղբորը տեսնում էր Մադաթի կերպարում:

«Վազք» կոչվածը դարձել էր երեխաների կյանքի իմաստը. այդ վազքից հետ մնալը կմշակներ պարտություն, որին նրանք պատրաստ չէին... չէ՞ որ երեխաներ էին: Պատերազմն անտարբեր չէր անցնում երեխաների կողքով. իր հետքն էր դրոշմել անգամ նրանց աչքերում եւ մտքում՝ թելադրելով նրանց առօրյան՝ «...նրանք զորավարություն էին անում»:

Չմայած Օտարն արհամարհված ու օտարված էր «վազքի ճանապարհի» իր ընկերներից, սակայն վազքից դուրս գալ նա պարզապես չէր կարող: Միայն ռազմագիտության ուսուցչուհու հրամանով էր այդ խմբի մեջ Օտարն իրեն արժեւորված ու գնահատված զգում, օտար չէր զգում, չէ՞ որ ինքն էլ պետք է հասներ սղոցարաններ, ինքն էլ պետք է թեփ բերեր... Օտարը «վազքի» սկզբում ընկերների հետ էր, սակայն այդ «վազքի» մեջ երկար մնալու ուղղակի նրա ուժերից վեր էր, չնայած որ դա նրա մարմնի պահանջն էր. «Վազքը իմ մարմնի պահանջն էր, ինչպես որ թեւերի պահանջը ճախրն է»: Սղոցարան չհասնելն Օտարի համար մեծ ցավ էր, բոլորը վազում են, միայն ինքը չէր... նրան տանջում էր այն միտքը, որ պիտի ասեմ՝ «Բոլորը տեղ են հասել, ճամփի կեսից միայն Օտարն է ետ եկել»: Սա Օտարին ուժ էր տալիս. նրա ազնվությունն ու արդարությունն էին նրան առաջ մղում... բայց այլևս չէր կարող:

Օտարը մեռնել էր մնում կես ճանապարհին, քանի որ ընկերն այլևս համբերել չէր կարող. չէր կարող, քանի որ նրա համար առավել բարձր եւ արժեքավոր էր հաղթանակը՝ թեփը, քան ընկերը՝ այդ անարգված ու արհամարհված օտարը, որն ուղղակի բեռ էր դարձել այդ «վազքի» ճանապարհին: Այստեղ հեղինակը ցույց է տալիս, որ Օտարն իր ողջ թուլությամբ հակադրվում էր հաղթանակին: Օտարի համար անընդունելի էր միակ ելքը, թե ճանապարհի եզրին մատուցած կանայք թեփ կտան իրեն... սակայն սա էր միակ ելքը:

Օտարին կես ճանապարհին թողած տղայի կերպարն ու ներաշխարհը բացահայտում է «վազքի» ճանապարհին հանդիպած



Բադալենց Դառը պապը. «Տո՛ շան տղա, բու հընկերոջը ճամփին դու ես թողել, ի՛նձ ես ասում ես տար»։ Այս խոսքերից հետո տղան ընկնում է խոր մտածումների մեջ, որոնք նրան մի պահ հանում են վազքի ընթացքից. նա այլևս չէր կարողանում վազել «վազքին» համընթաց, մի պահ «վազքը» կարծես հեռանում էր նրանից. «Սրտիս զարկերը խլացան, եւ հիմա խոր լռություն էր... ձյունների մեջ ես անշարժ էի»։ Անշարժ էր նաեւ տղայի հուշերում պատկերված Օտարը. «...ձյունների մեջ իրենց ձորում ինքն ու խաչքարն էին եւ գրեթե չէին շարժվում»։ Տղային տանջող մտքերն իրեն հանգիստ չէին տալիս։ Իրեն արդարացնելու համար նա հաշտության եզրեր էր որոնում, թե՛ «...աջ ձեռքով կհանձնեմ նրան թեփը», այդ թեփը, այդ հաղթանակը, նա իրականում պատրաստ էր հանձնել Օտարին՝ անապատի ավազների մեջ մնացած այդ լուռ սֆինքսին, որին քամիները վաղ թե ուշ թաղելու էին ավազե տմակի մեջ, եւ որի հողաշեն կոթողն այլևս չէր ապրելու։

«Ձայն չկար... դասասեսյակում մարդ չկար... ուսուցչանոցում մարդ չկար։ Բակն ամայի էր, ուսուցչանոցի շենքին մի քիչ թեփ կար...»։ Օտարին որեւէ մեկը չէր սպասում։ Նրան սպասում էր միայն ուսուցչուհին. «Իսկ Արտավազդն ո՞ր է»... վերջում միայն ժամացույցի ծանրոցն էր ճոճվում լռության մեջ՝ հավերժ խախտելով անդորրը, եւ միայն ժամացույցի ծանրոցն էր ապրում դեռ։

«Ես կռացա, երկու ձեռքով հավաքեցի մեր բոլորիս բերած թեփը, եւ ամբողջ թեփը եղավ մի բուռ աղբ...»։ «Վազքից» միայն այդ մի բուռ թեփն էր մնացել, իսկ Օտարն այլևս չկար։ Այս հատվածն ամփոփում է պատմվածքի ողջ գաղափարը, թե քանիսն են պատրաստ իրենց ընկերոջն օգնելու համար դուրս գալ իրենց «վազքից»... կյանքի վազքից։ Այստեղ հեղինակը բացահայտ մատնացույց է անում ընկեր-թեփի հարաբերությունը, որի արդյունքում «թեփը»՝ այդ մի բուռ աղբը, փոխարինում է Օտարին։

Սղոցարաններից բերված այդ ամբողջ թեփն ընդամենը մի բուռ էր, մի բուռ աղբ եւ ոչ ավելին, իսկ Օտարը...

Անահիտ ՊԵՏՐՈՍՅԱՆ

Լեւ Տոլստոյի հոգեհանգիստը...

← էջ 5

1910 թվականին Լեւ Տոլստոյի մահը սգում էր ողջ աշխարհը։ Իսկ հայկական եկեղեցիներում Հայոց հայրապետի կարգադրությամբ հոգեհանգստյան կարգ կատարելու որոշումը բացառիկ իրադարձություններից էր, որին ոչ միանշանակ արձագանքեցին հենց եկեղեցական շրջանակում։

Բենիկ վարդապետը հայ ժողովրդի հախումն ու հակասական զգացմունքների մասին իր խորհրդածությունները գրում է «Հովիտ»-ում.

«Հայ ժողովուրդն աշխարհից ոչ միայն յետ չընկաւ, այլ մինչ իսկ առաջ ընկաւ մեծ մարդուն յարգանքով ցօղելու գործում։

Հայ տաճարներն ամենից առաջ իրենց դռները լայն բացին այն հազարաւոր աղօթողների առաջ, որոնք հոսանքով լցուեցին՝ հոգեհանգստեան կարգով պատուելու մեծ մարդու յիշատակը։

Հայկական հաստատութիւնները յոտնկայս եւ խորհրդաւոր լռութեամբ պատուեցին այն։

Հայ մամուլը գերմարդ յայտարարեց յարգանքի արժանի մեջեցեալին։

...Ես միանում եմ հայ մամուլին եւ խորին յարգանքի ծունկ եմ խոնարհում այն երջանիկ բլրի վրայ, որ Եասնայա-Պօլեանայի մարգարէի երկրաւոր մնացորդն է ամփոփում...»։

Յեղիմե ՄԿՐՏՅԱՆ



Սանկտ Պետերբուրգի Ս. Կատարինե հայկական եկեղեցին

ՔՐԻՍՏՈՆՅԱ ՋԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»
թերթի խմբագրություն

Գլխավոր խմբագիր՝

Արփիմե Զանգիկյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/kristonya-hayastan

Ստոր. տպագր. 1.12.2022 թ.

Տպագրանակը՝ 1225